

後集 五之八

後母 附諸母

誕子

前後身

教子

爰子

有子

無子

祖孫

諸父 姪

兄弟

嫂叔

事文類聚

新宮城書藏

167  
3





167  
9



新編古今事文類聚後集卷之五

賜藎文庫

建安 祝穆 和父 梓

建業 唐富春 子和

人倫部

後母 伯叔母 所生母 庶母 乳母  
慈母 保母 出母 並附

繼母如母故孝子不敢殊也

伯叔父之兄妻為伯母父之弟妻為叔母

為庶母何以小功以慈已加也 慈母如母傳曰

妾之無子者妾子之無母者父命妾曰女以為子命子曰女以

為母若是則生養之終其身如母死則喪之三年如母貴父命

利 267 3

東京大學圖書館

評內

事文類聚後集 卷之五



之也 喪服

**慈母**

異為孺子室於宮中擇於諸母與可者必求其寬裕

慈惠溫良敬謹而寡言者使為子師其次為慈母其次為保母

皆居子室 內則

**繼母** 為父後者為出母無服

**書人事實**

舜事後母

舜父瞽瞍盲舜母死瞽瞍更娶妻而生象象傲瞽瞍愛後妻子

常欲殺舜 史記

後母逐子

殷王中宗之子曰孝已事親一夜五起中宗用後妻言竟逐之

假蜂進諍

尹吉甫子伯奇事後母至孝母取蜂去毒繫於衣上伯奇前欲

去之母便大呼曰伯奇牽我吉甫見疑伯奇自死 列女傳

蒸梨出妻

叱犬去妻 並見出妻門

子諫逐母

閔子騫為後母所苦冬月以蘆花衣之以代絮父知之欲出後

母子騫曰母在一子單母去三子寒遂止 孝子傳

不取後母

曾子出妻終身不取其子元請焉曾子曰高宗以後妻殺孝已

尹吉甫以後妻放伯奇吾上不及高宗中不及吉甫庸保其免



於非乎 家語

織屨給子

翟方進年十二三失父辭後母至京師母憐其幼隨至長安織屨以給方進後三十餘年至宰相母尚在

卧冰躍鯉

王祥性至孝繼母朱氏不慈數譖之由是失愛於父朱嘗欲得生魚時天寒冰凍解衣將剖冰求之冰忽自解雙鯉躍出

事伯母孝

以下係伯叔母  
羊祜年十五而孤事伯母蔡氏以孝聞 二十國春秋

叔母撫育

宋謝瞻幼孤叔母撫育有恩同於至親

不持所生服

以下係所生母

蔡延慶所生母已亡不為服久矣聞李定不服所生母為臺所評乃乞追服則知蟬匡蟬綫不獨成人之弟也是時有朱壽昌其所生母三歲捨去長大刺血寫經誓畢生尋訪凡五十年始得之奉養三年而亡壽昌至毀焉善人惡人相去乃爾遠耶余謫居於黃而壽昌為鄂守與余往還甚熟余為撰梁武懺引者也 志林

訪所生母

司農少卿朱壽昌方在襁褓而所生母被出及長仕於四方孜孜尋訪不逮治平中官至正郎矣或傳其母嫁為閩中民妻壽昌即棄官入閩中得母於陝州士大夫嘉其孝節多以歌詩美



之蘇子瞻為作詩序且譏激世人之不養者李定見其序大惋  
恨東軒筆錄

雖賤必貴

姑布子卿見無恤曰此真將軍也簡子曰此母賤翟婢也子卿  
曰天之所授雖賤必貴史

屈節為妾

周顛母李氏字絡秀顛父為安東將軍求絡秀為妾父兄不許  
絡秀曰門戶殄瘁何惜一女子遂與之生顛及高謨嘗曰我屈  
節為汝家妾詳見母子門

嫡母不禮

裴秀母賤嫡母宣氏不之禮秀叔父徽有盛名賓客甚眾秀年  
十餘歲有詣徽者出則遇秀宣氏使其母進饌於客見者皆起  
母曰微賤如此應為小兒故也宣氏知之乃止時人為之語曰  
後進領袖有裴秀

截髮供贖

陶侃母湛氏初侃父丹聘為妾生侃陶氏貧賤母紡績資之審  
陽孝廉范逵寓宿於侃時大雪湛氏乃徹所卧新薦自剉給其  
馬又密截髮供饌逵知之嘆曰非此母不能生此子列女傳

諸兄役母

崔道固為宋諸王叅軍被遣青州募人長史以下並詣道固道  
固諸兄等逼其所生自致酒炙於客前道固驚起謂客曰家無  
人力老親自執劬勞諸客皆知其兄所作咸拜其母卜謂道固



曰我賤不足以報貴汝宜答拜諸客皆歎美道固母子而賤其諸兄南史

母即姑婢

阮孚之母即姑婢也

詳見婢妾門

無外家

王符傳安定俗鄙庶孽而符無外家為鄉人所賤隱居著書以譏當世得失不欲章顯其名號曰潜夫論

為乳母解紛

以下係乳母

漢武帝乳母嘗於外犯事帝欲申憲乳母求救東方朔上曰此非唇舌所爭爾必望濟者將去時但當屢顧帝慎勿言此或可萬一鼻耳乳母繼至朔亦侍側因謂曰汝癡耳帝豈復憶汝乳

哺時恩耶帝雖材雄心忍亦深有情戀乃惻然愍之即免罪

韓晉公浙西觀察有乳母通求外事公欲殺之密求顧况營救

况詰公問之公曰天下皆知某守禮法乳母獨犯焉况曰公幼

時早起夜卧即要乳母今為侯伯乳母焉用哉誠宜殺也公乃

捨之

殺二乳母

見妬婦門

為慈母服

係慈母

昔者魯昭公少喪其母有慈母良及其死也欲喪之有司以聞

曰古之慈母無服今君為之服是逆古典公不忍為之練冠慈

母有服自公始

不喪出母

係出母



子之類聚後集 卷之五 五 後漢書  
子上之母死而不喪門人問諸子思曰昔者子之先君子喪出  
母乎子思曰爲伋也妻者是爲白也母不爲伋也妻者不爲白  
也母故孔氏之不喪出母自子思始也

古今文集

雜著

後母偏愛

凡庸之性後夫多寵前夫之孤後妻必虐前妻之子非惟婦人  
懷嫉妬之心丈夫有沉惑之僻亦事勢使之然也前夫之孤不  
敢與我子爭家提携鞠養積習生愛故寵之前妻之子每居已  
生之上官學婚嫁莫不爲防焉故虐之異姓寵則父母被怨繼  
親虐則兄弟爲仇家有此者皆門戶之禍也 顏氏家訓

古人不再娶

吉甫賢父也伯奇孝子也以賢父御孝子合得終於天性而後  
妻間之伯奇遂放曾參婦死謂其子曰吾不及吉甫汝不及伯  
奇王駿喪妻亦謂人曰我不及曾參子不如華元並終身不娶  
此等足以爲誡其後假繼慘虐孤遺離間骨肉傷心斷腸者何  
可勝數謹之哉謹之哉 顏氏家訓

古詩

履霜操

韓愈

尹吉甫子無罪爲後母譖而逐自傷作云

父兮見寒母兮見饑兒罪當笞逐兒何爲兒在中野以宿以處  
四無人聲誰與兒語兒寒何衣兒饑何食兒行於野履霜以足



母生衆兒有母憐之獨無母憐兒寧不悲

古詩係所生母

朱壽昌郎中少不知母所在刺血寫經求之五十年

去歲得之蜀中以詩賀之

蘇子瞻

溫公日錄云其母素微生壽昌歲餘遺出之

嗟君七歲知念母憐君壯大心愈苦羨君臨老得相逢喜極無  
言淚如雨不羨白衣作三公不愛白日昇青天愛君五十着綵  
服兒啼却得償當年烹龍爲炙玉爲酒鶴髮初生千萬壽金花  
詔書錦作囊白藤肩輿簾蹙繡感君離合我酸辛此事今無古  
或聞長陵竭來見大姊仲孺豈意逢將軍開皇苦桃空記面建  
中天子終不見西河郡守誰復譏穎谷封人羞自薦

雜著

係妾母

妾母之稱

問妾母之稱曰恐也只得稱母他無可稱在經只得云妾母不  
然無以別於他母也又問弔慰人妾母之歿合稱之云何曰恐  
也只得隨其子平日所稱而稱之或曰五峰稱妾母爲少母南  
軒亦然據爾雅亦有少姑之文五峰想是本此

朱語錄

雜著

係乳母係母

乳母墓銘

韓愈

乳母李氏徐州人號正直爲韓氏家乳其兒愈愈生未再周月  
孤失怙恃李氏憐不忍棄去視保益謹遂老韓氏及見其所乳  
兒愈舉進士第歷佐汴徐州入朝爲御史國子博士尚書都官



負外郎河南令娶婦生二男五女時節受慶賀愈輒率婦孫列拜進壽年六十四病卒卒三日葬河陽縣十五里愈率婦孫視窆封且刻其語于石納諸墓為銘矣

乳母任氏墓誌銘

蘇子瞻

趙郡蘇軾子瞻之乳母任氏名採蓮眉之眉山人父遂母李氏事先夫人三十有五年工巧勤儉至老不衰乳亡姊八娘與軾養視軾之子邁迨過皆有恩勞從軾官于杭密徐湖謫於黃元豐三年八月壬寅卒于黃之臨臯亭享年七十有二月壬午葬于黃之東阜黃岡縣之北銘曰  
生有以養之不必其子也死有以葬之不必其里也我祭其從與享之其魂氣無所不之也

保母楊氏墓誌

蘇子瞻

先夫人之妾楊氏名金蟬眉山山人年三十始隸蘇氏頽然順善也為弟轍子由保母年六十八熙寧十年六月己丑卒葬于徐州屬續不亂子由官于宋載其柩殯於開元寺後八年軾自黃遷汝過宋葬之于宋東南三里廣壽院之西實元豐八年二月壬午也銘曰  
百世之後陵谷易位知其為蘇子之保母尚勿毀也

誤子

雙生 遺腹子 並附

群書要語 男子生以桑弧蓬矢六以射天地四方  
男子設桑弧蓬矢於門左女子設悅於門右  
內則又 子生  
內則 三月之末擇



日剪髮為髻男角女羈是日也妻以子見於父母先相曰母某敢用時祗見孺子夫對曰欽有帥父執子之右子咳而名之

內則

誕彌厥月先生如達注誕大也又發語辭達羊子也

生民

上筮

下簞乃安斯寢乃寢乃興乃占我夢吉夢維何維熊維羆維虺維蛇大人占之維熊維羆男子之祥維虺維蛇女子之祥乃生

男子載衣之裳載弄之璋乃生女子載寢之地載衣之裼載弄

之瓦注半圭曰璋臣之職也瓦紡磚也

斯干

詩句孔子釋氏親抱送盡是天上麒麟兒

杜

掌中貪見一珠新

杜寄漢中王

驥之子鳳之雛

杜

揚杯祝願無他語謹勿頑愚似

汝翁

李白

憶爾懸弧日余為座上賓舉筋食湯餅祝辭天麒麟

麟劉禹錫贈張盟

玉樹長新枝

帝應物

豈料鬢成雪方看掌弄

珠

白樂天

何時能反鋪共養白頭烏

且有承家望誰能得子

遲

掌珠一顆兒三歲鬢雪千莖父六旬

玉牙珠顆小男兒

羅薦蘭湯浴罷時

芣苢春來盈女手梧桐老去長孫枝

並同上

去歲生兒名添丁意令與國充耘耔

韓贈盧全

頭玉峴峴眉刷

翠骨重神寒天廟器一雙瞳仁剪秋水竹馬梢梢搖翠尾

李賀

南山新長鳳凰雛眉目分明迥不如

臨川

虎兒可愛光陸離開

眼已有百步威

歐公洗兒歌

雙生

古人尚質雙生以後生者居上取以為兄

公羊傳

孿子之

相似惟其母知之

注孿雙生也

戰國策

遺腹子不思其父無貌於心也不夢見像無形於目也

淮南子

古今事實



禹契生之異

脩已背折而生禹 簡狄胃剖而生契

六帖

后稷生之異

姜嫄踐巨人跡而孕生子以為不祥棄於水上故名棄即后

稷也

生空桑中

維嶽降神

紱麟

饋鯉 並見生辰門

滅若敖氏

楚子良生子越椒子文子良之兄曰熊虎之狀而豺狼之聲弗殺必

滅若傲矣子良不可子文以為人感及將死聚其族曰椒也知

政乃速行矣無及於難且泣曰鬼猶求食若敖氏之鬼不其餒而子文卒於越司馬攻王楚滅若敖氏 宣四

喪羊舌氏

叔向欲娶申公巫臣氏其母止之曰甚美必有甚惡叔向懼不敢取平公強使娶之生子伯石始生子容之母走謁諸姑曰長叔妙生男姑視之及堂聞其聲而還曰豺狼之聲非是莫喪羊舌氏矣遂弗視 昭二十八

視子知貪

叔魚生其母視之曰是子虎目而豕喙鵞肩而牛腹谿谿可盈是不可饜又叔向曰晉有羊舌鮒者 叔魚之母弟 黷貨無厭亦將及矣



寤生驚母

鄭武公娶于申曰武姜生莊公及其叔段莊公寤生驚姜氏因名寤生

生而同物 見姓名門

夢蘭而生

鄭文公有賤妾燕姑夢天使與已蘭曰以是為而子以蘭有國香人服媚之如是既而文公與之蘭而御之曰妾幸而有子敢徵蘭乎

天星孕秀 見生辰門

三日母亡

東方朔生三日而母田氏死隣母收養之時東方始明因以姓

焉朔生五歲忽失經年乃歸母問之朔曰兒暫之紫泥海右紫

水汚衣仍過虞泉前沈明發中還何言經年乎 洞真記

胡婦生子

蘇武留匈奴十九歲年老子前坐事死宣帝問之問左右武在匈奴父豈有子乎武因平恩侯白前發匈奴時胡婦適產一子名通國有聲問來頗因使者致金帛贖之上許焉通國至上以為郎

老人子無影

陳留有富翁年九十取田客女為妾一交接而死後生男大男謂其母曰我父年尊無父人道一宿斯湏何因有子女小家淫泆反欲汚我種類乎爭財數年州郡不決丞相兩吉思維良久



言曾聞真人無影老翁子亦無影又不耐寒可共試之時八月取同年小兒俱解裸之此兒獨啼言寒又並日中行後獨無影人咸嘆服風俗通

老蚌生珠

後漢帝元將弟誕仲將孔融與其父書曰前日元將來淵才亮茂雅度弘毅名世之器也昨日仲將來文敏篤實保家之士也不意雙珠近出老蚌

禁殺子

賈彪為新息令息人貧困多不養子彪嚴為制與殺人同罪

產子并蛇

竇武母生子并產一蛇

藍田生王

諸葛恪少有名孫權見其父瑾曰藍田生王真不虛也

生子愧無功

晉元帝生子普賜群臣殷羨謝曰臣無勳猥蒙頒賚帝笑曰此

事豈可使卿有勳世說

聽啼知英物

桓溫宣城太守彞之子也生未期而太原溫嶠見之曰此兒有奇骨可試使啼及聞其聲曰真英物也彞以嶠所賞遂名桓溫曰果爾後將易吾姓也本傳

新婦配參軍

王渾妻鍾氏琰太傅繇曾孫也博覽記籍美容止善嘯詠既適



渾生子濟渾嘗與琰坐濟趨庭而過渾吹然曰生子如此足慰人心琰笑曰若使新婦得配參軍生子固不翅如此參軍謂渾中弟淪也

天上麒麟

見生辰門

方生知死

魏舒徵時嘗詣野王主人妻夜產俄聞車馬之聲相問曰男也女也曰男答云十五以兵死復問寢者為誰曰魏公舒後十五年詣主人問所生兒曰因條桑為斧傷而死魏自知當為公矣後果位至司徒

夢虜脫上衣

索克夢虜脫上衣索統曰虜去上男也君婦當生男果然

生日湯餅

唐明皇王后恩寵日衰不自安一日訴曰三郎獨不記阿忠脫新半臂換一斗麵為生日湯餅耶上戚然閱之

夢九鶴

張九齡母夢九鶴自天而下飛集于庭遂生九齡

夢燕投懷

張說母夢王燕投懷遂生說定命錄

錯寫美璋

太常少卿姜度謨子李林甫手書慶之有日聞有美璋之喜客視之掩口職林

雌甲辰



生丙子

小戊子 並見生辰門

夢賜五子

竇禹鈞家甚豐年三十無子夜夢亡祖亡父聚謂之曰汝早脩行緣汝無子又壽數不永禹鈞唯諾後十年復夢其祖父告之曰汝自數年以來名掛天曹陰府以汝有陰德延美三紀賜五子各榮顯 光文正公述

生黃鶴樓

王欽若父仲華侍祖都官鄂渚欽若母有孕值江水暴溢亟遷黃鶴樓始娩生公時隔岸漢陽人望樓上若有光景 青箱雜記 試晬知貴 見年齒門

夢得基子

李泰伯母初無子祈禱無所不至祥符二年夢二道士奕碁戶外往觀之其一人取局之一子授焉遂孕生泰伯

一男一女 以下係雙生

晉惠公之在梁也梁伯妻之梁嬴孕過期卜云當生一男一女男為人臣女為人妾故名男曰圉名女曰妾 僖十七

一產六子

陸修娶鬼方國君之妹謂之女嬪孕而不育二年啓其母左脅三人出右脅三人出 帝系

一產二子

霍將軍妻產二子疑所為兄弟或曰前生為兄後生為弟或曰



居上者宜為兄居下者宜為弟居下前生今宜以前生為弟時  
霍光聞之曰昔廢王祖甲一產二子曰囂曰良以卵生囂以已  
生良則以囂為兄以良為弟並以前生者為長霍氏亦以前生  
為兄焉 西京雜記

存趙孤兒 以下係遺子

趙朔為屠岸賈攻滅朔有遺腹子朔夫人置兒襁中得脫朔客  
公孫杵臼程嬰二人謀取他嬰兒負之以文祿匿山中嬰謂  
諸將曰吾知趙氏孤處諸將發兵隨之公孫杵臼謬呼曰趙氏  
孤兒何罪請活之諸將殺杵臼與孤兒然趙氏真孤友在程嬰  
處為匿十五年因韓厥復立之是為趙武程嬰自殺曰我將下  
報宣孟與公孫杵臼武為服齊衰三年為之祭邑 史記

有祖風烈

李廣子當戶早卒有遺腹生子陵陵有廣之風烈

同生丁卯

鄭玄子為孔融吏舉孝廉融被圍往赴難遇害有遺腹子以丁  
卯日生玄以丁卯歲生故名曰小同

繼父不容

杜祁公衍越州人父早卒遺腹生公前母有二子不孝其母改  
適河南錢氏公年十五六其二兄以為其母匿私財以適人就  
公索之不得引劍斫之傷腦走投其姑姑匿之重櫛上出血數  
升僅而得免乃詣河南歸其母繼父不之容從來孟洛間貧甚  
傭書以自資 東軒筆錄



體有四乳

范忠文公鎮兗鎡卒于隴城無子聞其有遺腹子在外公時未仕徒步求之隴蜀間二年乃得之曰吾兄異於人體有四乳是兒亦必然驗之果然遂名曰百常

墓誌

古今文集

雜著

睥日試兒

江南風俗兒生一期為製新衣盥浴裝飾男則用弓矢紙筆女則刀尺針縷並加飲食之物及珍寶服玩置之兒前觀其發意所取以驗貪廉愚智名之為試週親表聚集致燕享焉自茲以後二親若在每至此日常有酒食之事亦無教之徒雖已孤露

其日皆為供頓暢聲樂不知有所感傷梁孝元帝年少之時每

八月六日載誕之辰常設齋講自阮脩容薨歿之後而此事亦

絕顏氏家訓

古詩

借韻賀子由生第四孫斗老

蘇子瞻

今日散幽憂彈冠及新沐况聞萬里孫已報三日浴朋來四君子大壯泰臨復開書喜見面未飲春生腹無官一身輕有子萬事足舉家傳好夢殊相驚凡目爛爛開眼電礲礲峙頭王但令強筋骨可以耕衍沃不須富文章端解耗紙竹君歸定何日我計久已熟長留五車書要使九子讀簞瓢有內樂軒冕無流矚人言殆似我窮達已可卜蚤謀二頃田莫待入州錄



律詩

洗兒

蘇子瞻

人皆養子望聰明。我被聰明誤一生。惟願孩兒愚且魯。無災無難到公卿。

洗兒二首

即文公也

朱喬年

行年已合識頭顱。舊學屠龍意轉疎。有子添丁助征戍。肯令清苦更冠儒。

其二

舉子三朝壽一壺。百年歌好笑掀鬚。厭兵已識天公意。不忍回頭更指渠。

賀陳述古弟章生子

蘇子瞻

鬱葱佳氣夜充間。始見徐卿第二雛。剝欲去為湯餅客。惟愁錯寫弄璋詩。參軍新婦賢相敵。阿大中郎喜有餘。我亦從來識英物。試教啼看定何如。

夷仲叔父幼子晬日詞

幼子謂深尚書

黃魯直

骨秀已知騏驥子。性仁端是鳳凰雛。不騰渥水稱神俊。應出岐山作瑞符。漸指家人知姓字。試看屏上識之無。乃翁斷獄多陰德。徑作高門待汝車。

詩話

自愧無功

南唐時宮中嘗賜洗兒果。有近臣謝表云。猥蒙寵數。深愧無功。李主曰。此事卿安得有功。坡賀洗兒詞云。犀錢王果。利市平分。



露四坐自愧無功此事如何到得儂

茗溪漁隱

### 犀角豐盈

鄭語云史伯言幽王惡犀角豐盈而近頑童窮困故坡詩云未得豐盈犀角兒先逢王雪王郎子又曰眼中犀角真吾子身後牛衣愧老妻

### 氣可食牛

尸子曰虎豹之駒雖未成文已有食牛之氣故杜詩云小兒五歲氣食牛坡詩云見之齧齧中已有食牛氣後山云虎子墮地氣食牛

### 晚始得子

邵堯夫四十餘始娶生男有詩曰我今行年四十五生男方始

為人父鞠育教誨誠在我壽夭賢愚係於汝我若壽年七十歲眼前見汝二十五我欲願汝成大賢未知天意肯從否

聞見錄

### 摩頂能行

東坡中子追生四歲不能行請辯林禪師為落髮摩頂祝之不數日能行坡詩曰我有長頭兒角頰峙犀王四歲不知行抱負煩背腹師來為摩頂起走逐奔鹿

## 前後身

群書要語前後身本出釋氏輪迴之說

### 古今事實

### 取金環



羊祜年五歲令乳母取所美金環乳母曰汝先無此物祜即詣鄰人李氏東園桑木中探得之主人驚曰此吾亡兒所失物也云何持去乳母具言之乃知李氏子則祜前身也

沙門前身

中書令王珉有一胡沙門瞻珉風采曰使我後生得爲此人作子願亦足矣後珉生一子始能言便解外國語及絕國珠貝生所未見即識其名咸謂沙門後身

洞冥記

取刀子

向靜有女數歲而亡始病時弄小刀子母奪取不予傷母手後又產一女年四歲曰前時刀子何在母曰無也女曰昔爭刀子故傷母手何云無也靖覓數刀合置一處令女自識女見大喜

而即取先爭者

具祥記

能記墮井

晉鮑靖字太玄年五歲語父母云本是李家兒九歲墮井而死父母訪之皆驗

永師前身

唐房瑄爲盧氏宰與道士刑和璞出遊過夏口村入廢寺坐古松下和璞使人鑿地得甕中所藏劉師德與永禪師書謂瑄曰頗憶此耶瑄因悵然悟前身之爲永禪師也

東坡詩序

取香囊

後蜀文澹生五歲謂母曰有五色香囊在杏林中往取得之乃澹前生五歲失足落井今再生也



夢謝康樂

江南邊鎬初生父忽夢前永嘉守謝靈運來謁願託君為父子鎬生貌類夢中者小字康樂及冠穎秀嗣主累用之平建州克湘潭號邊羅漢 王壺清話

僧孺後身

劉沆曾祖景洪事楊行密為江西牙將有彭肝者稱太守脇景洪附湖南僞許之復以歸行密遂不仕初景洪曰我不從彭肝因活萬餘人後必隆因名所居山曰復隆山山有牛僧孺讀書堂沆母夢牛相公來而生沆

因夢立名

范祖禹母夢一丈夫被金甲至寢曰吾故漢將鄧禹也祖禹是

日生公遂以名初字夢得温公以傳鄧禹篤行淳備乃改字淳甫 家傳

李白後身

郭祥正母夢李太白而生祥正少有詩名梅堯臣曰天才如此真太白後身也

古今文集

雜著

論前後身

隋李士謙

客有不信佛家報應者士謙曰積善餘慶積惡餘殃豈非休咎耶佛經云轉輪五道此賈誼所謂千變萬化未始有極也若鯨為黃熊杜宇為題頰褒君為龍牛哀為虎君子為鵠小人為猿



黃母為龜宣武為鱉鄧艾為牛徐伯為魚此非佛家變受異形之謂耶客曰邢子才云豈有松柏後身化為樗櫟者士謙曰此不類之說也變化皆由心作木豈有心乎客亦不能難

律詩

贈湖州司馬

李白

青蓮居士謫仙人酒肆藏名三十春湖州司馬何須問金粟如來是後身

詩話

亡兒再生

顧况字通翁暮年一子即非熊前身也非熊暴亡况追悼哀切乃吟曰老人喪愛子日暮泣成血老人年七十不作多時別非

熊在冥間聞之以情告冥官皆憫之却令生况家三歲能言冥間聞父苦吟之事

樂天後身

白樂天晚極喜李義山詩文嘗謂我死得為爾子足矣義山生子遂以白老字之既長略無文性温庭筠嘗戲之云以爾為樂天後身不亦忝乎然義山有哀師我嬌兒美秀乃無匹之譽何也蔡寬夫云

太白後身

梅聖俞贈郭功父詩以為李白後身末云死生往復猶康莊樹穴探環知姓羊全篇見風濤之險云

敵帥托身



東越萃淑英張兩王之配也以乏嗣禱岳廟夢先汝王引一將  
至端幃曰此同姓敵帥名甫字維幹者前乃赤大成星思凡謫  
降于丙戌歲九月二日亥時用繼世宦必須脩造及期創桂香  
書屋工畢而生天愚子遂號幹父後封揚州衛侯自是仕進不  
絕

白崇天朗致喜本義山特文嘗贈并史幹為國子吳吳義山主

學天公長

問問父苦人之毒

讀其其開國之以前古其官官國之法今主其容三無道言其

新編古今事文類聚後集卷之六

建安 祝穆 和父 編

建業 唐富春 子和 梓

人倫部

教子 父教 母教  
教姪 見姪門

群書要語 教誨爾子式穀以之 小宛 教者必以正 古者易子

而教之 父子之間不責善責善則離離則不祥莫大焉 並離

婁下 父詔其子兄詔其弟 莊子 百世小人知讀論語孝經尚為

人師雖千載冠冕不曉書記者莫不耕田養馬若能保數百卷

書終不為小人也諺曰積錢千萬無過讀書 顏氏家訓註闕閱



子弟門子弟門禁童子之暴詭則師友之誠不如傅婢之指揮止凡人  
之鬪閱則堯舜之道不如寡妻之誨諭同上

**詩句**失學從兒懶杜過子詩似翁我唱兒輒酬坡小兒弄筆不

能噴浣壁書窓且賞勤錫閑來案上翻筆墨塗抹詩書如老稚

盧仝先生堂前雪月苦弟子讀書喧兩廡坡

**古今事實**

學詩學禮以下係父教

孔子嘗獨立鯉趨而過庭曰學詩乎對曰未也曰不學詩無以  
言鯉退而學詩他日又獨立鯉趨而過庭曰學禮乎對曰未也  
曰不學禮無以立鯉退而學禮

教以義方

衛莊公之子州吁有寵而好兵公弗禁石蜡諫曰臣聞愛子教  
之以義方不納於邪隱三

教忠

晉懷公命無從亡人期期而不至無赦狐突之子毛及偃從重  
耳在秦弗召懷公執狐突曰子來則免對曰子之能仕父教之  
忠古之制也策名委質貳乃辟也今臣之子名在重耳有年數  
矣若又召之教之貳也父教子貳何以事君乃殺之僖二十二

不食示訓見子孫門

教子一經

常賢字長孺子玄成字少翁俱以明經位至丞相故語曰遺子  
黃金滿籬不如教子一經 齊柳世隆盛事墳典張緒曰觀君



舉措當以清名遺子孫耶荅曰一身之外亦復何須子孫不才將為爭府如其才也不如一經

教誨

陳萬年子咸數言事譏刺近臣萬年病召咸戒床下語至半夜咸瞻頭觸屏萬年大怒曰乃公教戒汝汝反不聽何也咸曰具曉所言大要教咸諂也萬年乃不復言

戒子承家

鄭玄以書戒子益恩曰入此歲來已七十矣家事大小汝一承之家今頗多於昔勤力務時無恤饑寒非飲食薄衣服尚可令吾寡恨

子各通經

鄧禹有十三男各命通一經 晉劉殷有七子五子皆授一經 一子授太史公一子授漢書

怒其驕傲

顏延之嘗早詣竣見賓客盈門竣尚未起延之怒曰汝出糞土之中升雲霞之上遽驕傲如此其能久乎

屏風書誡

房玄齡恐諸子驕侈集古今家誡書為屏風令各取一具曰留意於此足以保躬矣

居家有法

柳公綽最名有家法中門東有小齋自非朝謁之日每平旦輒出至小齋諸子仲郢皆束帶晨省於中門之比公綽決私事接



賓客與弟公權及群從弟再會食自旦至暮不離小齋燭至則命子弟一人執經史躬讀一過乃講議居官治家之法或論文或聽琴至於定鍾然後歸寢諸子皆昏定於中門之內

已肉子蔬

五代唐劉贇父玘為縣令贇始就學衣以青布衫襦每食則自肉食別以蔬食食贇牀下曰肉食君之祿也爾欲之則勤學以干祿吾食非爾之食也由是贇力學舉進士

戒子安分

韓忠憲戒其子曰窮達禍福固有定分枉道以求之徒喪所守切勿為也余以孤忠自信未嘗有因緣憑藉而每遭人主為知已今忝三公所恃者公道與神明而已焉可誣也 唐介一日

自政府歸語諸子曰吾備位政府知無不為桃李固未嘗與汝栽培而荆棘則甚多矣然汝等窮達亦自有命惟安分自勉而已

湘山錄

燕客索杖

韓忠憲億教子嚴肅知亳州第二子舍人自西京倅謁告省覲康公與右相及姪柱史宗彥皆中甲科歸公喜置酒召僚屬之親厚者俾諸子坐於席隅惟持國多深思知必有義方之訓託疾不赴坐中忽云二郎吾聞西京有疑獄奏讞者其詳云何舍人思之未得已訶之再問未能對遂推案索杖大詬曰汝食朝廷厚祿倅一府事無巨細皆當寃心大辟奏案尚不能記則細務不舉可知吾在千里無所干預猶能知之爾叨冒廩祿何



顏報國必欲捷之衆賓力解方已諸子股栗家法之嚴如此所以多賢子孫也忠憲八子曰綱綜絳繹緯緝維縵絳緝皆宰相維門下侍郎蘇氏家訓

教子毋誑

司馬公云光五六歲美胡桃女兄欲為脫其皮不得女兄去一婢以湯脫之女兄復來問脫胡桃者光曰自脫也先君適見之訶曰小子何得漫語自是不敢漫語後公以誠授學者曰從不妄語入是也邵氏後錄

責子不賢見父子門

戒婢往來

丁彦輔云予昔官洛陽有外醫媪張氏公鄉士人家無不到說

富鄭公治家嚴肅有二子舍凡使女僕輩戒不得互相往來閨門肅如也塵史

三徙擇隣以下係母教

孟軻母其舍近墓孟子少嬉遊於墓間為其事母曰此非所以處子也乃去舍市傍其嬉戲為賈人街賣之事又曰此非所以處子也復徙舍學宮之傍其嬉戲乃設俎豆揖遜進退母曰此真可以居吾子遂居焉列女傳

買肉教信

孟子少時聞東家殺猪問母何為曰欲啖汝既而母悔曰吾嘗教以割不正不食席不正不坐今適有知而欺之是教之不信也乃買隣猪肉以食之韓詩外傳



斷機勉學

孟母三徙居孟子學而歸母問學所至孟子自若也孟母以刀斷機曰子之廢學若吾斷機織孟子懼勤學不息遂成名儒

不受魚鮓

吳孟仁為鹽池司馬自能結網手捕魚作鮓寄母母還之曰汝為魚官而以鮓寄我非所以避嫌也

不受蚶鮓

陶侃為潯陽縣吏嘗監魚梁以一蚶鮓遺母湛氏母封還其鮓更貽書責之曰汝為吏以官物遺我非惟不能益吾反以增吾憂矣

壯猶播擻

王大司馬母魏夫人性甚嚴王在湓城時為三千人將年踰四十少不如意猶播擻之故能成其勲業

顏氏家訓

筭金易書

唐子晉王弟麴智湛入朝位驍騎大將軍其子昭好學有鸞異書者母顧筭中金曰何愛此不使子有異聞乎遂持易之

入仕欲貧

崔元暉為軍校負外郎母盧氏戒之曰吾見辛亥馭云兒子從官者聞有人來云貧乏不能自存此是好消息吾聞貨資充足衣馬輕肥此是惡消息吾重此言汝今坐食俸祿若不能忠清何以戴天履地須特加脩潔勿累吾此意也

職官分紀

內訓甚嚴

德壽堂



呂榮公希哲字原明申國正獻公之長子正獻公居家簡重寡  
默不以時事經心而申國夫人性嚴有法雖甚愛公然教公事  
事循蹈規矩甫十歲祁寒盛暑侍立終日不命之坐不敢坐也  
日必冠帶以見長者平居雖甚熱在父母長者之側不得去巾  
襪縛袴衣服唯謹行步出入無得入茶肆酒肆市井里巷之語  
鄭衛之音未嘗一經於耳不正之書非禮之色未嘗一接於目  
正獻公與申國夫人教訓之嚴如此故公德器大異於人

秤槌投足

寇萊公準少時不脩小節頗愛飛鷹走犬太夫人性嚴母不勝  
怒舉秤槌投之中足流血由是折節從學及貴母已亡每捫其  
瘡痕輒哭郡記聞

杖碎金魚

陳堯咨善射號小由基及守荆南回其母馮夫人問汝與郡有  
何異教堯咨曰每以弓矢為樂母曰汝父教汝以忠孝輔國家  
今汝不務行仁化而專務一夫之勇豈汝父之志耶杖之碎其

金魚燕談

聽客與語

張密學奎弟密省亢母宋氏白之族也親教督二子讀書客至  
輒於窓間聽之客與其子論文學政事則為之設饍或閑話  
諧謔則不設也後二子皆登第奎少嗜酒嘗有酒失母怒欲笞  
之遂不飲終身

古今文集



雜著

弟子職

先生施教弟子是則溫恭自虛所受是極見善從之聞義則服  
溫柔孝弟毋驕恃力志毋虛邪行必正直游居有常必就有德  
顏色整齊中心必式夙興夜寐衣帶必飭朝繹暮習小心翼翼  
一此不懈是謂學則

教子

顏之推

上智不教而成下愚雖教無益中庸之人不教不知也古者聖  
王有胎教之法懷子三月出居別宮目不邪視耳不妄聽音聲  
滋味以禮節之書之王版藏之金匱子生孩提師保固明仁孝  
禮義導習之矣凡庶縱不能令當及嬰孩識人顏色知人喜怒  
便加教誨使爲則爲使止則止比及數歲可省管罰父母威嚴  
而有慈則子女畏慎而孝矣吾見世間無教而有愛母不能然  
飲食運爲恣其所欲宜誠翻獎應訶反笑至有識知謂法當爾  
驕慢已習方復制之播撻至死而無威忿怒日隆而增怨逮於  
成長終爲敗德孔子云少成若天性習慣如自然是也俗諺曰  
教婦初來教兒嬰孩誠哉斯語

古詩

責子

陶潛

白髮披兩鬢肌膚不復實雖有五男兒總不好紙筆阿舒已二  
八懶惰故無匹阿宣行志學而不愛文術雍端年十三不識六  
與七通子垂九齡但覓梨與栗天運苟如此且進杯中物



黃山谷云觀淵明此詩想見其人慈祥戲謔可觀也俗人便謂淵明諸子皆不肖而淵明愁嘆見於詩耳又杜子美詩陶潛避俗翁未必能達道觀其著詩篇頗亦恨枯稿達生豈是足默識蓋不早生子賢與愚何其掛懷抱夫子美困頓於山川蓋爲不知者詬病以爲拙於生事又往往譏議宗文宗武失學故聊解嘲耳其詩名曰遺興可解也俗人便謂譏病淵明所謂痴人前不得說夢也

贈張籍

韓愈

吾老嗜讀書餘事不掛眼有兒雖甚憐教示不免簡君來好呼出踉蹌越門限懼其無所知見則先愧赧昨因有緣事上馬挿手版留君住廳食使立侍盤盞薄暮歸見君迎我笑而筇指渠相賀言此是萬金產吾愛其風骨粹美無可揀試將詩義按如以肉貫串開袪露毫末自得高巖巖我身蹈丘軻爵位不早縮固宜長有人文章紹編刻感荷君子德恍若乘朽棧吾今吐所記解摘了愁憊顧視窓壁間親戚諺規贊喜氣排寒冬逼耳嗚睨睨如今更誰恨便可耕灞澹

符讀書城南

韓愈

木之就規矩在梓匠輪輿人之能爲人由腹有詩書詩書勤乃有不動腹空虛欲知學之力賢愚同一初由其不能學所入遂異閭兩家各生子提孩巧相如少長聚嬉戲不殊同隊魚年至十二三頭角稍相疎二十漸年長清溝映污渠三十骨骼成乃一龍一豬飛黃騰踏去不能顧蟾蜍一爲馬前卒鞭背生蟲蛆



一為公與相潭潭府中居問之何因爾學與不學歟金壁雖重  
寶費用難貯儲學問藏之身身在則有餘君子與小人不係父  
母且不見公與相起身自犁鋤不見三公後寒饑出無驢文章  
豈不貴經訓乃蓄畚潢潦無根源朝滿夕已除人不通古今馬  
牛而襟裾行身陷不義况望多名譽時秋積雨霽新涼入郊墟  
燈火稍可親簡編可卷舒豈不旦夕念為爾惜居諸恩義有相  
奪作詩勸躊躇

王得臣塵史云王荆公集唐李杜韓吏部洎歐陽文忠公  
歌詩謂之四選集王莘樂道謂予曰集不取韓公符讀書  
城南一篇何也予曰是篇大概教子以取富貴宜荆公之  
不取也且子有賢與愚何其掛懷抱淵明猶不免子美之

譏况示以取富貴哉樂道以為然

寄舅抱孫

盧仝

別來三得書書道遠離久書處甚粗殺且喜見汝手殷十七又  
報汝文頗新有別來經年囊益未合斗當是汝母賢日夕加  
訓誘尚書當畢功禮記速須剖嘍囉兒讀書何異摧枯朽尋義  
低作聲便可養年壽莫學村學生僮氣強叫吼下學偷工夫新  
宅鋤藜莠乘涼勸奴婢園裏耨葱韭遠籬編榆棘近眼栽桃李  
引水灌竹中蒲池種蓮藕撈漉蛙螭脚莫遣生蚪斗竹林吾最  
惜新筍好看守萬籀包龍兒攢迸溢林藪吾眼恨不見心腸痛  
如搗宅錢都未還債利日日厚籀龍正稱冤莫殺入汝口丁寧  
囑託汝汝活籀龍否殷十七老儒是汝父師友傳讀有疑誤請



告咨問取兩手莫破拳一吻莫飲酒莫學捕鳩鴿莫學打雞狗  
小時無大傷習性防已後頑發苦惱人汝母必不受任汝惱弟  
妹任汝惱姨舅姨舅非吾親弟妹多老醜莫惱添丁郎添丁詩見愛子  
門淚子作面垢莫引添丁郎赫赤日裏走添丁郎小小別吾來  
又又脯脯不得喫兄兄莫撚搜他日吾歸來家人若彈糾一百  
放一下打汝九十九

律詩

遣興

杜甫

驥子好男兒前年學語時問人知客姓誦得老夫詩

示宗武名驥

杜甫

覓句新知律攤書解滿床試唸青玉案莫帶紫羅囊假日從時

飲明年共我長應須飽經術已似愛文章十五男兒志三千弟  
子行曾參與游夏達者得升堂

聞龜兒誄詩

白居易

憐渠已解美詩童搖膝支頤學二郎莫學二郎吟大苦纔年四  
十鬢如霜

愛子

知子 味於知子 並附

群書要語 撫我育我顧我復我出入腹我蓼莪 恩斯勤斯鬻子

之閔斯鳴鶚 愛其子擇師而教之 韓師說

詩句 驕兒不離膝畏我却復去 杜 得書報平安肥字如棲鴉 黃

知子 知子莫若父 昭十三

事文類聚後集

卷之六

十一



殊於知子

人莫知其子之惡 大學

古今事實

愛共叔段

鄭莊公寤生驚姜氏遂惡之愛共叔段欲立之請京使居之謂之京城大叔大叔完聚繕甲兵具卒乘將襲鄭 隱三

教以義方 見教子門

人愛少子

左師觸龍見太后曰老臣賤息舒祺最少臣竊憐之願補黑衣之闕太后曰丈夫亦愛少子乎對曰甚於婦人 史太子傳

老牛舐犢 見喪子門

抱置膝上

王坦之字文廣父述愛之雖長大猶抱置膝上

不與講論

林道人詣謝東陽時始總角新病起與林公講論遂至相苦王夫人自壁後出云新婦一生所寄惟在此兒流涕抱兒以歸謝公曰家嫂詞情慷慨致可傳述恨不使朝士見 世說

寵愛失教

梁元帝時有一學士聰敏有才為父所寵失於教義一言之是徧於行路終年譽之一行之非揜歲文飾異其自改年登婚寇暴慢日滋竟以言語不擇為周逖抽腸囊鼓云 顏氏家訓

譽見癖

王福時五子勳勳勃助勸皆以文顯嘗託於韓彥思彥思戲之



曰武子有馬癖君有譽兒癖王家癖何多耶

知子可舉

以下係知子

祁奚請老晉侯問嗣曰午也可

知子必敗

趙括少學兵法父奢不能詰然不謂善曰兵死地而括易言之  
趙王以括為將代廉頗藺相如曰括徒能讀其父書傳不知合  
變及括將行母上書願王勿遣即有不稱妾得無隨坐可乎

視子知貪

見課子門

知子奢儉

范蠡至陶致貲鉅萬自謂陶朱公中子殺人囚於楚朱公曰吾  
聞千金之子不死於市告其少子曰往視之長男曰家有長子

曰家督乃遣少弟是吾不肖也欲自殺朱公不得已遣長子至  
則楚王怒論殺朱公子明日下勅長男竟持其弟喪歸朱公笑  
曰吾固知其必殺弟汝見吾貧苦時重惜金所以卒殺汝弟如  
少弟生而見我富乘堅驅良豈知財之從來吾欲遣少弟為能  
棄財也

史記

知子賢愚

張安世長子千秋與霍光子禹俱隨范明友擊烏桓還謁大將  
軍光問千秋戰鬪方略千秋口對兵事畫地成圖無所遺失問  
禹禹不能記光由是賢千秋以禹為不材

知子不能

薛宣子惠亦官二千石始為彭城令宣過其縣心知惠不能案



行舍中處置什物終不問以吏事

知子必富

石崇司徒苞之幼子生於青州故小名齊奴少敏慧有謀苞臨終分財物與諸子獨不及崇其母以爲言苞曰此兒雖小後能自得及爲荊州刺史劫遠使商客致富不貲

知子能書

見字學門

知子所得

晉穆帝問顏延之曰竣得臣筆測得臣文奧得臣義躍得臣酒

知子必貴

唐王珪少與房杜善珪母李曰而必貴然未知所與遊者何如人試與偕來會玄齡等過其家母大驚勅具酒食曰二客公輔才汝貴不疑按杜甫送王砮詩則珪母杜氏非李氏也

不知子能文

以下係昧於知子

陳思王植太祖嘗視其文曰汝倩人耳植跪曰固當面試柰何倩人時建鄴銅雀臺新成太祖將諸子登臺使各賦植援筆立成太祖甚異之

不爲父所知

山簡濤之子也簡歎曰吾年幾三十而不爲家公所知

遇以常見

謝惠連初有竒才不爲父方明所知族兄靈運謂方明曰阿連才悟如此而尊作常見遇之

以豚犬畜



萬迴師神若痴愚雖父母亦以豚犬畜之兄戎役安西音問隔絕忽一日朝往夕返曰兄平善發書視之乃兄手迹其家以其萬里而迴故號萬迴

開元傳信記

古今文集

雜著

愛子致禍

人之愛子亦罕能均自古及今此弊多矣賢俊者自可賞愛頑魯者亦當矜憐有偏寵者雖欲以厚之更所以禍之共叔之死母實為之趙王之戮父實使之劉表之傾宗覆族袁紹之地裂兵亡可為明鑒

顏氏家訓

古詩

示添丁

盧仝

春風苦不仁呼逐馬蹄行人家慚愧瘴氣却憐我入我憔悴骨中為生涯數日不食強起行何忍索我抱看滿樹花不知四體正困憊泥人啼哭聲呀呀忽來案上翻墨汁塗抹詩書如老鴉父憐母惜摑不得却生痴笑令人嗟宿春連曉不成米日高始進一椀茶氣力龍鍾頭欲白憑仗添丁莫惱爺

唐人多傳盧仝因留宿王涯第中途預甘露之禍仝老無髮闌人於腦後加釘焉人以為添丁之讖或言好事者為之仝處士於人無怨何為有此謗然平時切齒元和逆黨月蝕一詩膾炙人口意者群闈以此禍之

北征

杜甫



况我墮胡塵及歸盡莖髮經年至茅屋妻子衣百結慟哭松聲  
迥悲泉共幽咽平生所驕兒顏色白勝雪見爺背面啼垢膩脚  
不鞵牀前兩小女補綻絳過膝海圖折波濤舊繡移曲折天吳  
及紫鳳顛倒在短褐老夫情懷惡嘔泄卧數日那無囊中帛救  
汝寒凜慄粉黛亦解包衾稠稍羅列瘦妻面復光癡女頭自櫛  
學母無不為曉粧隨手抹移時施朱鉛狼籍畫眉潤生還對童  
穉似欲忘饑渴問事競挽鬚誰能即嗔喝翻思在賊愁甘受雜  
亂聒新歸且慰意生理焉得說

律詩

嘲小德

黃魯直

中年舉兒子謾種老生涯學語轉春鳥塗窓行暮鴉欲嗔王母

惜稍慧女兒誇解著潛夫論不妨無外家

有子

不肖子 附

群書要語子克家 蒙卦 幹父之蠱 裕父之蠱 並蠱卦 篤前人

成烈 洛誥 克紹前烈 商命 維其有之是以似之 裳華 國人稱頌

然曰幸哉有子如此所謂孝也已 祭義 良冶之子必學為裘良

弓之子必學為箕 樂記 稚子候門 陶 姆抱幼子立側眉眼如畫

髮漆黑肌肉玉雪可憐娟好靜秀瑤環瑜珥蘭茁其芽穠其家

見 韓愈撰馬公墓誌

詩句昔別君未婚兒女忽成行 杜 弱妻抱幼子出拜忘慙羞 韓

有客過茅宇呼兒正葛巾 性 是時應門見紫蘭茁其芽 山谷 義



之生五之

坡

兒女嬉笑牽人衣

李

牽衣兒女遶太白扇枕即君

煩阿香

坡

大兒跟蹤越門限小兒咿啞語綉帳

坡

如今莫問老

與少兒子森森如立竹

坡

**不肖子**

若考作室既底法厥子乃弗肯堂矧肯構厥父菑厥子

乃弗肯播矧肯獲其肯曰予有後弗棄基

大詰

其父析薪其子

弗肯負荷

左

厥子乃不知稼穡之艱難

無逸

弗念厥紹

柳

行莫

醜於辱先

司馬遷

**古今事實**

才子八人

昔高陽氏有才子八人謂之八愷高辛氏有才子八人謂之八元此十六族也世濟其美

五世傳一子

楊雄傳自季至雄五世而傳一子故雄無它楊於蜀

各守一藝

鄧禹子十三人各使守一藝教養子孫為後世法

必興吾門

陳群為兒時祖寔謂宗人曰此兒必興吾門

當如仲謀

曹公攻濡須塢孫權拒之乘輕船入曹公軍還作鼓吹公見整

肅嘆曰生子當如孫仲謀劉景升兒子豚犬耳

吳志

梁帝曰生

子當如李亞子克用為不亡矣吾見豚犬耳

五代

荀氏八龍



荀淑有子八人謂之八龍

一不為少

梁陸瓊幼聰慧從祖襄嘆曰此兒必荷門基所謂一不為少  
褚淵嘗謂任昉父遙曰聞卿有令子相為喜之所謂百不為多  
一不為少

頭角嶄然

柳宗元少精敏逮其父時雖年少已自成人能取進士第嶄然  
見頭角衆謂柳氏有子矣墓誌

令子

鄭餘慶子湑為右補闕敢言無忌諱憲宗謂餘慶曰湑卿令子  
而朕直臣也可更相賀

從登登昂霄

高孝基見房玄齡曰僕聞人多矣未有如此郎者當為國器但  
恨不見其登登昂霄耳

西平有子見父子門

竇氏五龍見及第門

韓氏八龍

韓忠憲八子時以比荀氏八龍詳見教子門

不才子以下係不肖子

帝鴻氏有不才子掩義隱賊好行凶德醜類惡物頑嚚不友是  
與比同謂之渾敦少皞氏有不才子毀信廢忠崇飾惡言猜譖  
庸面服說菟慝以誣盛德謂之窮奇顓帝氏有不才子不可訓



教不知話言告之則頑舍之則器傲狠明德以亂天常謂之禱  
杌此三族也世濟其凶縉雲氏有不才子貪於飲食冒於貨賄  
浸欲崇侈不可盈厭聚斂積實不知紀極不分孤陋不恤窮匱  
天下之民以比三凶謂之饕餮舜臣堯賓於四門流凶族投四  
裔以禦魑魅左文

朱均不肖

堯之子不肖

丹朱

舜之子亦不肖

商均

不辨菽麥

程滑殺厲公荀營士魴逆周子曰師而立之周子有兄而無慧  
不能辨菽麥故不可立注豆麥殊形易別故以為癡者之候不  
慧蓋世所謂癡左桓温左凶子禘不辨菽麥

怒其不敬

丙吉子顯少為諸曹嘗從祀高廟至夕牲乃使出取齋衣丞相  
吉大怒謂其夫人曰宗廟至重而顯不敬謹亡吾爵者必顯也  
甘露中有罪削爵為關內侯

不如友子

後漢太原王霸妻不知誰氏霸立高節與同郡令狐子伯為友  
子伯為楚相而其子為郡功曹子伯令子奉書於霸車馬服從  
雍容如也霸子方耕於野聞客至投耒而歸見令狐子沮忤不  
能仰視霸目之有愧色客去卧不起妻恠問故霸曰吾與子伯  
素不相若向見其子容貌甚光舉措有適我兒曹蓬髮歷齒未  
知禮則父子恩深不覺自失耳妻曰君少脩清節不顧榮祿今



子伯之貴孰與君之高奈何忘初志而慙兒子乎霸崛起而笑曰有是哉遂共隱終其身

若豚犬耳 見有子門

不識金鋌

梁廬陵王續之子應不慧王薨至庫內閱珍物見金鋌問左右曰此可食否荅曰不可應曰既不可食並總乞汝

不肖敗家

覆試曳白 並見閱園子弟門

不隱子過

姚崇二子在洛通賓客饋遺憑舊請託魏知古歸悉以聞他日帝召崇曰卿子才乎皆安在崇揣知帝意曰臣二子分司東都

其爲人多欲而寡謹是必嘗以事干魏知古帝始以崇私其子及聞大喜問安從得之對曰知古臣所薦也臣子謂必見德而請之帝於是愛崇不私而薄知古

子不識字

韓昶退之子也性闇劣爲集賢校理史傳有金根車昶以爲誤悉改根字作銀字 尚書故實

一賢一否

中宗嘗召宰相蘇瓌李嶠子進見瓌子頰曰木從繩則正后從諫則聖嶠子迹曰斲朝涉之脛剖賢人之心上曰蘇瓌有子李嶠無兒

子爲人患



狄仁傑爲魏州刺史有惠政百姓爲之立生祠後其子景暉爲魏州司功參軍貪暴人患焉遂毀其像

古今文集

古詩

徐鄉二子歌

見幼悟門

過於海舶得邁寄書酒作詩遠和之皆粲然可觀子由有書相慶因用其韻賦一篇并寄諸子姪

蘇子瞻

我似老牛鞭不動雨滑泥深四蹄重汝如黃犢走却來海澗山高百程送庶幾門戶有八慈不恨居隣無二仲他年汝曹笏滿床中夜起舞踏破甕會當洗眼看騰躍莫指癡腹笑空洞譽兒

雖是兩翁癖積德已自三世種豈惟萬一許生還尚恐九十煩珍從六子晨耕簞瓢出衆婦夜績燈火共春秋古史乃家法詩筆離騷亦時用但令文字還照世糞土腐餘何足夢

贈山谷子

蘇子瞻

黃童三尺世無雙筆頭滾滾懸秋江不憂老子難爲父平生崛強今心降我來喜共阿戎語應敵縱橫如急雨生子還如孫仲謀豚犬謾多何足數黃家小兒名拾得眉如長松眼如漆只今數歲已動人老人留眼看他日笑君老蚌生明珠自笑此物吾家無君當置酒吾當賀有見傳業更何須

詩話

不肖子三變



不肖子弟有三變第一變為蝗蟲謂鬻莊而食第二變為蠹魚謂鬻書而食第三變為大蟲謂賣婢子而食三食之輩何代無之北夢瑣言

藉祖大魁多所及嫂黃寒小兒各計其言收其公如收其只今  
黃童三入世無雙筆題刻刻懸麻正不憂亦下懸為父平生

曾山谷子

蘇子卿

筆輒翻亦謂用則今文字豈照世糞土爾繪所及也  
每於六子景赫單標出眾敵敵餘登火共未亦古史已家去指

新編古今事文類聚後集卷之七

建安 祝穆 和父 編  
建業 唐富春 子和 梓

人倫部

無子

喪子 立嗣 並附

群書要語不孝有三無後為大離婁老而無子曰獨梁惠內無

應門五尺之童李密表

詩句中郎有女能傳業伯道無兒可係家韓

喪子汝目汝面在吾眼旁韓祭女孀文

詩句傷心自嘆鳩巢拙長墮春雛養不成白愁淚隨心迸白

事文類聚後集 卷之七



五 螟蛉之子殪而逢螺贏祝之曰類我類我父則肖之矣子揚

**古今事實**

無子無憂

商瞿年老無子其母為取室孔子曰無憂瞿年四十後當有五丈夫已而果然

老而無子

楚靈王聞群公子之死自投於車下曰人之愛其子亦如子乎侍者曰甚焉小人老而無子知擠於溝壑矣

子自晚生

梁鱣年三十未有子欲出其妻商瞿曰吾恐子自晚生耳未必妻之過鱣從之二年而有子並家語

不可無後

王思子文之治楚國也曰子文無後何以勸善使復其所改命曰生宜四成季之勲宣孟之忠而無後為善者懼矣成八不可

使恭叔無後於鄭莊十六

若敖氏鬼見諛子門

多女無男

齊太倉令淳于公無子有女五人有罪當刑罵曰生女不生男緩急非所益其幼女緹縈自傷泣上書願沒入為官婢以贖父罪書奏文帝憐之除肉刑

無子改娶

陵穆子娶妻五年無子父母欲其改娶其妻聞之中夜悲嘯陵



穆子感傷而作別鶴操

韓文

### 無子依人

樓護字君卿故人呂公無子而歸護護養之終其身

### 伯道無兒

鄧攸字伯道後石勒過泗水攸以牛馬負妻子而逃遇賊掠其牛馬步走擔其兒及弟子緩度不能兩全乃謂其妻曰吾弟早亡惟有一息理不可絕止當自絕我兒耳幸而得存我後當有子妻泣而從之乃棄之其子朝棄而暮及明日攸繫之於樹而去後妻不復孕過江納妾甚寵之訊其家屬說是遭亂憶父母姓名乃攸之甥攸素有德行聞之感恨遂不復畜妾卒以無嗣時人哀之爲之語曰天道無知攸伯道無兒

贊曰攸棄子存姪以義斷恩若力所不能自可割情忍痛

何至預加微墨絕其奔走者乎斯豈慈父仁人之用心也

卒以絕嗣宜哉勿謂天道無知乃有知矣

### 喪子喪明

以下係喪子

子夏喪其子而喪其明曾子弔而怒之曰喪爾子而喪其明爾罪三也子夏投其杖而拜之曰吾過矣

### 子死不憂

魏人有東門吳者年四十有二子喪之而不憂其相室曰公之愛子也天下無有今子死而不憂何也吳曰吾嘗無子之時不憂今子死乃與向日無子同吾何憂焉

列子

### 老牛舐犢



後漢王彪位至太尉彪見漢祚將終襍脚學不復行積十年後子脩為曹操所殺操見彪問曰公何瘦之甚荅曰悔無日殫先見之明猶懷老牛舐犢之愛操為改容

鍾情幼子

王衍嘗喪幼子山簡弔之衍悲不自勝簡曰懷抱中物何至於此衍曰聖人忘情最下不及情然則情之所鍾正在我輩簡服其言更為之慟

恨其死晚

郝超字嘉賓將亡出其所與桓温密謀之書一篋囑其門生曰若家君眠食太減即出此書方回見之曰是子死已晚矣乃不復念

天下痛心

王愆期謂陶侃曰賢子越騎酷没天下為公痛心况慈父乎世說

不忍開篋

王導還臺其子悅未嘗不送又為襃歛箱篋中物悅亡導還臺至常途處哭之至臺其母封篋不忍開之

神奪其子

王導子悅為中書郎先導卒導先夢人以百萬錢買悅潛為祈禱者備矣尋掘地得錢百萬意甚惡之一一皆藏閉及悅疾篤導憂念特至不食積日忽見一人形狀甚偉被甲持刀導問是何人曰僕蔣侯也公兒不佳欲為請命故來耳導因與之食食至數斗食畢謂導曰中書命盡非可救也言訖不見悅隨殞絕



心疑計至

豫章太守顧邵雍之子也在郡卒雍時盛集賓客自與客碁而讀至無兒書雖神色不變而心了其故以爪插掌流血沾襟客散方歎已無延陵之高豈有喪明之痛世說

瘞於路側

潘岳西征賦曰天赤子於新安坎路側而瘞之注岳子以三月

生五月天六十餘日也

以姪孫為後

係立嗣

白樂天無子以姪孫阿新為之後墓誌

白集

律詩

白蘇州寄詩有歎早白無兒之句因以贈之

劉禹錫

莫嗟華髮與無兒却是人間久遠期雪裏高山頭白早海中仙  
果子生遲于公必有高門慶謝守何煩曉鏡悲幸免如新分非  
淺祝君長詠夢熊詩

古詩以下係喪子

東野連產三子不數日數失之幾老念無後以悲友  
人韓愈推天假其命以喻之

鳴梟啄母腦母死子始蕃蝮蛇生子時坼裂腸與肝好子雖云  
好未還恩與勤惡子不可說鳴梟蝮蛇然有子且勿喜無子回  
勿歎



律詩

喪子崔兒

白居易

書報微之晦叔知欲題崔字決先垂文章十帙官三品身後傳誰庇蔭誰

哭邢惇夫

黃魯直

詩到隨州更老成江山為助筆縱橫眼看白壁埋黃壤何況人間父子情

吟白君哭崔兒詩悽然寄題

劉禹錫

吟君苦調我霜纓能使無情盡有情四望車中心未釋千秋亭下賦初成庭梧已有雛棲處池鶴今無子和聲從此期君比瓊樹一枝吹折一枝生

亡女生日感懷

戴叔倫

五逢晬日今方見置爾懷中自惘然乍喜老身辭遠役翻悲一笑隔重泉欲教針線嬌難解暫弄琴書性已便還有蔡家殘史籍可能分付外人傳

瘞女作詩

韓昌黎貶潮州時小一遺死瘞之層峰驛之下題詩驛梁云數條藤束木皮棺草殮荒山白骨寒

祖孫

諸孫附

群書要語真祖

見宗族注

無忝爾祖

繩其祖武

下武續戎祖



考孫民子之子為孫孫之子為曾孫曾孫之子為玄孫玄孫之

子為來孫來孫之子為舅孫舅孫之子為仍孫仍孫之子為雲

孫注輕遠如浮雲也爾雅仍漢書作耳應邵曰耳孫者元孫之

子也言其去高曾益遠但耳聞之也惠紀注

詩句郟超叛鑿似無孫坡

古今事實

祖孫並相

伊尹相湯伊陟相大戊

召公是似

召康公奭十六世孫召穆公虎佐宣王平淮夷故江漢之詩曰  
文武受命召公維翰無曰予小子召公是似

孔孫中庸

孔子之孫子思作中庸

祖孫移山

北山愚公年且九十面山而居懲山北之塞出入之迂也遂率  
子孫荷擔扣石墾壤箕畚運於北海之尾河曲智叟笑而止之  
愚公長息曰我之死有子在焉子又生孫孫又生子子又生孫  
子子孫孫無窮匱也而山不加增何苦不平于是河曲智叟無  
以應之列子

三世惡始彰

左氏傳秦伯問士鞅曰晉大夫誰先亡對曰其欒氏乎厲伏虐  
已甚猶可以免其身禍在盈也欒厲死盈之善未能以及人武



子之施沒矣而厲之惡實彰將于是乎在後晉果滅樂氏應劭曰晉大夫欒書書子厲厲子盈書賢而覆厲厲惡而害盈曹大家曰天命佑善災惡非有差也然其道廣大雖父子百葉猶若一體也

在其子孫

陳厲公生敬仲其少也周史有以周易見陳侯者陳侯使筮之曰此遇觀之否曰是觀國之光利用賓於王其代陳有國乎不在此其在異國不在其身在其子孫光遠而自他有耀者也其後陳桓子成得政於齊左

不食示訓

石奮歸老於家子孫為小吏來歸謁必朝服見之不名子孫有過失不誚讓為便坐對案不食諸子相責肉袒謝罪迺許子孫勝冠者在側雖燕必冠申申如也

皆以學顯

董仲舒子及孫皆以學成至顯官

封蕭何孫

漢武帝元狩元年封故鄴侯曾孫為鄴侯

賈誼有孫

賈誼之孫賈嘉

不以產業

疏廣事見宗族門

有祖風

李廣有孫陵為侍中善騎射愛人下士帝以為有廣之風後降



虜隴西之士以為深耻

遺以清白

楊震性廉子孫嘗蔬食步行或勸之開產業震曰使後世稱為清白吏子孫以此遺之不亦厚乎 靈帝謂楊震孫奇曰卿強項真楊震子孫

遺之以安

龐公未嘗入城府夫妻相敬如賓劉表候之龐公釋耕隴上而妻子耘於前表指而問曰先生苦居畎畝而不肯官祿後世何以遺子孫龐公曰世人皆遺之以危今獨遺之以安雖所遺不同未嘗無所遺也表嘆息而去

嗣守為難

陳寔字仲弓子紀字元方諡字季方父子並著高名至孫群仕魏領丞相 荀淑字季和荀卿十一世孫有八人時謂八龍而慈明無雙至孫或從魏太祖太祖曰吾之子房

朱文公贊云群既附曹或亦忘漢室嗣守之難今古共嘆

分其子孫

王羲之牽諸子抱弱孫一味之其割而分之以娛目前

玄有靈運

謝靈運祖玄晉車騎將軍父暎生而不慧早亡靈運幼穎敏玄甚異之謂親知曰我乃生暎暎見何不及我暎乃生靈運靈運幸過暎

祖奇此兒



衛玠年五歲風神秀異祖父璿曰此兒有異於衆顧吾年老不見其長成耳

陶公遠祖

陶潛侃之孫

詳見祖父門

祖以硯與

見年齒門

因石思祖

薛元超轉中書舍人省中有盤石祖道衡為侍郎時嘗撥以草制元超每見之輒泫然流涕

子有佳兒

許敬宗孫彥伯昂子也頗有文敬宗晚年不復下筆凡大典冊悉彥伯為之嘗戲昂曰吾兒不及若兒對曰渠父不如昂父世

說張蒼梧張憑之祖也嘗語其父曰我不如汝憑父未解所以

蒼梧曰汝有佳兒憑時年數歲歛手曰阿翁詎宜以子戲父

發明祖書

姚瑛始曾祖蔡嘗著漢書訓纂而後之著漢書者多竊取其義為已說瑛著紹訓以發明舊義

不辨群孫

後周李遷哲嘗除真州刺史即本州也遷哲妾媵百數男女六十九人緣漢十餘里第宅相次姬媵之有子者分處其中遷哲鳴笳導從往來其間縱酒歡燕子孫叅見或忘其年名披簿以審之 汾陽郭子儀諸孫數十人每問安不盡辨領之而已

喜有曾孫



周蕭愿梁宰相頌之子曾祖倣唐僖宗朝入相接客之次愿爲  
兒童戲効傳呼之聲倣語諸客曰余不敢以得位爲喜所幸者  
壽考今又有曾孫在吾目前

祖孫宰相

李栖筠之子吉甫其孫德裕

祖孫名將

馬璘讀馬援傳至丈夫當死邊野慨然曰使吾祖勳墜地下乎  
卒爲中興名將

祖笏猶存

唐文宗以右拾遺魏謩徵之裔孫頗竒之謩累諫轉起居舍人  
紫宸中謝上曰卿家有舊書詔否對曰比多失墜惟笏笏存上

曰進來鄭覃曰在八不在笏上曰覃不辭朕意此其棠之義非  
笏而已宣宗嘗曰謩名臣孫有祖風朕心憚之 贊曰謩之議  
論挺挺有祖風烈

見其三世

韓愈撰殿中少監馬君墓誌曰始余初冠應進士貢在京師窮  
不能自存出故人稚弟拜北平王燧於馬前王問而憐之因得  
見於安邑里第王軫其饑寒賜食與衣召二子使爲之主當是  
時見王於北亭猶高山深林龍虎變化不測傑魁人也退見少  
傳即其子暢翠竹碧梧鸞鵠停峙能守其業者也姆抱幼子立  
側眉眼如畫髮漆黑肌肉玉雪可憐娟好靜秀瑤環瑜珥蘭茁  
其芽稱其家兒即殿中少監馬君繼祖也嗚呼吾未耄自始至今未四十年



而哭其祖子孫三世於人世何如也

古今文集

雜著

誠子孫訓

柳玘

夫門地高者一事墜先訓則異它人雖生可以苟爵位死不可見祖先地下門高則自驕族盛則人窺嫉實藝懿行人未必信纖瑕微累十手爭指脩己不得不至爲學不得不堅士君子生於世已無能而望他人用已無善而望他人愛猶農夫鹵莽種之而怨天澤不潤雖欲弗餒可乎余幼聞先公僕射言立己以孝弟爲基恭默爲本畏怯爲務勤儉爲法肥家以忍順保交以簡恭廣記如不及求名如儻來蒞官則廉已省事而後可以言

家法家法備然後可以言養人直不近禍廉不沽名憂與禍不偕潔與富不並董生有云弔者在門賀者在閭言憂則恐懼恐懼則福至又曰賀者在門弔者在閭言受福則驕奢驕奢則禍至故世族遠長與命位豐約不假問龜著星數在處心行事而已先君兄弟三人俱居清列非速客不二羨馘食藪葡萄而已皆保重名於世名門右族莫不由祖考忠孝勤儉以成立之莫不由子孫頑率奢傲以覆墜之成立之難如升天覆墜之易如燎毛余家本以學識禮法稱於士林夫行道之人德行文學爲根株正直剛毅爲柯葉有根無葉或可俟時有葉無根膏雨所不能活也至於孝慈友悌忠信篤行乃食之醢醬可一日無哉

戒子孫

邵堯夫



上品之人不教而善，中品之人教而後善，下品之人教亦不善。不教而善，非聖而何？教而後善，非賢而何？教亦不善，非愚而何？是知善也者，吉之謂也；不善也者，凶之謂也。吉也者，目不觀非禮之色，耳不聽非禮之聲，口不道非禮之言，足不踐非禮之地。人非善不交，物非義不取，親賢如就芝蘭，避惡如畏蛇蝎。或曰：不謂之吉人，則吾不信也；凶也者，語言詭譎，動止陰險，好利飾非，貪淫樂禍，疾良善如讎隙，犯刑憲如飲食。小則殞身滅性，大則覆宗絕祀。或曰：不謂之凶人，則吾不信也。傳有之曰：吉人爲善，惟日不足；凶人爲不善，亦惟日不足。汝等欲爲吉人乎？欲爲凶人乎？

家訓

蘇子瞻

漢酈曼容戒子孫，仕不過六百石，郎官謁者不爲顯。吾尚以爲過汝等，但能守家法，傳家學，貧不免仕官，則循資路於吏部，注擬差遣，雖筦庫亦可以無愧矣。

諸父

姪附

群書要語：既有肥羜，以速諸父。疏伯父、叔父。伐木父之昆弟，先生爲世父，後生爲叔父。爾雅父之從父昆弟爲從祖父。同上伯把也。把持家政也。父弟爲仲，仲中也。位在中也。仲父之弟曰叔父，叔少也。叔父之弟曰季，季癸也。甲乙之次，癸在下也。釋名兄弟之子猶子也。蓋引而進之。檀弓姪對姑而言，今人於伯叔父前皆以爲猶子。蓋記禮者主喪服言，如夫子謂回也，視予



猶父若以姪謂之猶子則亦當以先生為猶父矣漢人謂之從子却得其正蓋伯叔皆從父也 朱語錄

**詩句** 令嗣才俊茂

杜選帝評事

嗣宗諸子姪早覺仲容賢 杜旋

看蠟鳳戲僧虔

東坡寄三猶子

君家自與竹林齊 坡和劉原父

**古今事實**

說以日飲

爰盎為吳相兄子種說以日飲無何

叔姪掛冠

見致仕門

已子兄子

後漢第五倫字伯魚或問倫有私乎曰余兄子嘗病一夜十起退而安寢余子有病雖不省視而通夕不寐若是可謂無私乎

伯姪分財

薛苞弟子求出苞不敢止乃中分其財奴婢引其老病者曰與我共事久若不能使也田廬取其荒墳者曰吾少時所治意所戀也器物取其朽敗者曰我服食久身口所安也

失愛叔父

曹操小字阿瞞少無度叔父數言之於嵩 操之 操患之逢叔父於路乃陽敗面啣口叔父以告嵩嵩呼操曰叔父言汝中風已差乎操曰初不中風但失愛叔父故見罔耳後叔父有所告嵩不復信操始肆意

叔姪並遊

阮咸字仲容任達不拘與叔籍為竹林之遊南阮富北阮貧 詳見



携子姪遊

謝安字安石於東山營墅樓館林木甚盛每携中外子姪往來遊集肴饌亦屢費百金世頗以此譏焉而安殊不以屑意

庭階芝蘭

謝玄與從兄朗為叔父安所器因戒約子姪曰子弟亦何豫人事而正欲使其佳玄曰如芝蘭玉樹欲使生於庭階耳

舉姪督軍

謝安兄子玄有經國才略時苻堅數侵寇安乃舉玄為前鋒戰于淝水苻堅餘眾棄甲宵遯聞風聲鶴唳以為王師至

叔焚香囊

謝玄少時好佩紫羅香囊叔父安患之而不欲傷其意因戲賭而焚之於是遂止

杖姪設饌

見飯燕門

棄子全姪

魏張範子陵及弟子戡為山賊所得範直詣賊請二子賊以陵還範範謝曰諸君相還兒厚矣夫人情雖愛其子然吾憐戡之小請以陵易之賊義其志悉以還範此與伯道無兒類詳見無子門

阿大中郎

見婚姻門

姪千里駒

符助堅從兄子也堅嘗目之曰吾家千里駒

鞠愛其姪



桓宣武溫薨桓南郡玄冲之姪十五歲始除桓車騎與送故文武別冲因指語南郡此皆汝家故吏佐玄應聲慟哭酸感桓車騎每自目已坐曰靈寶玄小字成人當以此坐還鞠愛過於所生撫育孤姪

謝幾卿家門篤睦兄才卿卒子早孤幼幾卿撫育甚厚及長皆幾卿獎訓之力

伯父稱美

王曇首與兄弟會集諸子孫任其戲適僧虔採蠟珠為鳳凰伯父獨稱其美

臣叔不癡

王湛初有隱德人莫能知兄弟宗族比以為癡兄子濟輕之嘗詣湛見床頭有周易濟請言之因剖析玄理微妙有竒趣嘆曰家有名士三十年而不知濟去叔送出門濟從騎有一馬難乘無能騎者請騎之曰策如素濟益嘆其難測既還渾問濟何以暫行累日始得一叔渾問其故具嘆述如此渾曰何如我濟曰濟以上人武帝每見濟輒以湛調之曰卿家癡叔死未濟對曰臣叔殊不癡具稱其美

乞封叔父

魏王基封安樂鄉侯上疏求分封二百戶賜叔父子喬爵關內侯以報叔父詔特聽之

請封兄子

唐魏徵以定五禮當封一子縣男徵請封孤兄子叔慈帝愴然



曰此可以勸俗耶許之

伯父見奇

柳公綽始生之日伯父子華曰興吾門者此兒也因小字起之

自乳兄子

元德秀兄子襁褓喪親無資得乳媪乃自乳之數日湏流能食乃止

薦姪可用

呂文穆公蒙正致政居洛真宗祀汾陰過洛幸其宅問曰卿諸子孰可用公對曰臣諸子皆豚犬不足用有姪夷簡任潁州推官宰相才也帝記其言遂至大用蓋文靖公也

聞見錄

奏兄子官

陳忠肅公權兄弟友愛伯氏畢世公撫恤其孤初奏郊恩捨已子而先伯父之子及後貶責以至終身諸子皆白衣未嘗有不滿之意

遺事

古今文集

雜著

誠兄子書

馬援

吾欲汝曹聞人過失如聞父母之名耳可得而聞口不得言也好議論人長短妄是非政法此吾所大惡也寧死不願子孫有此行也龍伯高敦厚周密口無擇言謙約節儉廉公有威吾愛之重之願汝曹效之杜季良豪俠好義憂人之憂樂人之樂清濁無所失父喪致客數郡畢至吾愛之重之不願汝曹效之效



伯高不得猶爲謹勅之士所謂刻鵠不成尚類鶩效季良不得  
陷爲天下輕薄子所謂畫虎不成反類狗者也

范文正公與姪帖

三郎官人昨得書知在官平善此中亦如常只是純祐未全安  
汝守居須小心不得欺事與同官和睦多禮有事只與同官議  
莫與小人商量莫縱鄉親來部下興販自家且一向清心做官  
莫營私利汝看老叔自來如何還曾營私否自家好家門各爲  
好事以光祖宗頻寄書來言彼動靜將息將息不具叔報

右范文正公與其兄子之書也其言近而易知凡今之仕  
者得其說而敬守之亦足以檢身而及物矣然公所自謂  
未嘗營私者必若公之先天下之憂而憂後天下之樂而  
樂然後爲能克其名實而其所論親僚友以銷壅蔽之萌  
明禁防以杜交私之漸者引而伸之又非獨効一官之守  
者所宜知也侯官大夫陳君焯得公此帖刻真坐隅以自  
警省某蓋三復焉而嘆其指之遠而不可窮也敢竊識其  
說於左方庶幾覽者有以發焉年月日新安朱某謹書

司馬文正公與姪帖

叔五月二十三日到京與八哥哥以下俱安八哥哥飲食起居  
甚健殊不似去年在鄉里時不用憂得光近蒙聖恩除門下侍  
郎此皆祖考餘慶家門厚福致茲忝竊誠爲多幸然光素無才  
能加以衰老又在沉散絕望顯榮一朝陞擢出人意表舉朝之  
人悉非舊識逆見忌嫉者何可勝數而獨以愚直之性處於其



間如一黃葉在烈風中幾何其不危墜也是以受命以來有懼  
而無喜汝輩當識此意倍須謙恭推讓伏弱於人不可恃賴我  
聲勢作不公不法攪擾官方侵凌小民使爲鄉人所厭苦則我  
之禍皆起於汝輩如曹侍中兒帶累曹侍中貶隨州自縊歿也  
且當共相愛惜我身若危則汝輩亦不如人也我待牒縣令榜  
街市豫先約束汝輩所以曲相保全使不陷於刑法且莫恠也  
時熱且各好自將息叔報五通直以下六月三日

易之家人以勿恤爲相愛老子謂慈故能勇司馬文正所  
以訓約其家者峻厲嚴密凜乎其不可犯此慈愛之至也

玉山汪應辰書

古詩

冬至日示小姪阿宜

杜牧

小姪名阿宜未得三尺長頭圓筋骨緊兩臉明且光去年學官  
人竹馬遶四廊指揮群兒輩意氣何堅剛今年始讀書下口三  
五行隨兄旦夕去斂手整衣裳去歲冬至日拜我立我旁祝爾  
願爾貴仍且壽命長今年我江外今日生一陽憶爾不可見祝  
爾傾一觴陽德比君子初生甚微芒排陰出九地萬物隨開張  
一似小兒學日就復月將勤勤不自已二十能文章仕官至卿  
相致君作堯湯我家公相家劍佩常丁當舊第開朱門長安城  
中央第中無別物萬卷書滿堂家集二百編上下馳皇王多是  
撫州鷹今來五紀強尚可與汝讀助爾爲賢良經書刮根本史  
書閱興亡高摘屈宋艷濃薰班馬香李杜泛浩浩韓柳摩蒼蒼



近者四君子與古爭強梁頌汝一祝後讀書日日忙一日讀十  
紙一月讀一箱朝廷用文治大開官職場頌爾出門去取官如  
驅羊吾兄苦好古學問不可量晝居府中第夜歸書滿床後貴  
有金玉必不爲爾藏崔昭生崔芸李兼生窟郎堆錢一百屋破  
散何披猖今雖未即死餓凍幾欲僵叅軍與縣尉塵土驚動勳  
一語不中治笞箠身滿瘡官罷得絲髮好買百樹桑稅錢未輸  
足得米不敢嘗願爾聞我語懽喜入心腸大明帝官闕杜曲我  
池塘我若自潦倒看爾爭翱翔總語諸小道此詩不可忘

此篇視符讀書城南之作尤淺陋矣姑錄之以爲世戒

蘇子由已卯生坡號爲卯君生子名虎兒坡詩云

舊聞老蚌生明珠未省老兔生於菟老兔自謂月中物不騎快

馬騎蟾蜍蟾蜍爬沙不肯行坐令青衫生白鬚於菟駿猛不類  
渠指揮黃熊駕黑貍丹砂紫麝不用塗眼前百步走妖狐玄猿  
莫誇智有餘不勞搖牙咀爾徒

律詩

送王牧往吉州謁王使君叔

李嘉裕

細草綠汀洲王孫耐薄遊年華初冠帶文體舊弓裘野渡花爭  
發春塘水亂流使君怜小阮應念倚門愁

送姪孫隨乃父知命舟行

山谷

莫去沙邊學釣魚莫將百丈作轆轤清江濯足江下坐燕子日  
長宜讀書

詩話



退之姪

退之詩云阿買不識字頗知書八分詩成使之寫亦足張吾軍  
或問山谷阿買是何人山谷云退之姪必有所據而云耳又有  
示姪湘詩詳見牡丹門

譽子姪

牧之譽阿宜義山譽衮師其後二子皆無聞

新編古今事文類聚後集卷之七

新編古今事文類聚後集卷之八

建安

祝穆

和父

編

建業

唐富春

子和

梓

人倫部

兄弟

兄弟俱貴 從兄弟

義兄弟 並附

群書要語兄荒也荒大也弟第也相次第而生也釋名此令兄

弟綽綽有裕不令兄弟交相為瘡角弓棠棣之華鄂不韡韡凡

今之人莫如兄弟 死喪之威兄弟孔懷原隰衰矣兄弟求矣

脊令在原兄弟急難每有良朋况也永嘆 兄弟閱于墻外

禦其侮每有良朋烝也無戎 喪亂既平既安且寧雖有兄弟



不如友生 儻爾邊豆飲酒之飲兄弟既具和樂且孺 妻子  
好合如鼓瑟琴兄弟既翕和樂且湛 宜爾室家樂爾妻孥是  
究是圖豈其然乎 棠棣伯氏吹篪仲氏吹塤 何人斯 叔兮伯兮  
倡予和女籥兮豈無他人不如我同父 杜 終鮮兄弟謂他人  
昆 揚之水 陟彼岡兮瞻望兄兮兄曰嗟予弟行役 陟岵 兄及弟  
矣式相好矣母相猶矣 斯干 宜兄宜弟令德壽豈 蓼蕭 惟孝友  
于兄弟施于有政 君陳 兄弟睦家之肥也 禮運 兄之齒鴈行 王  
制 敬其兄則弟悅 孝經 兄弟雖有小忿不廢懿親 左 兄弟天倫  
左襄二 惠競爽猶可又弱一介焉 左 叔出季處 昭元 兄弟怡怡  
語十三 紵兄之臂而奪之食不紵則不得食則將紵之乎 告子  
吾弟則愛之秦人之弟則不愛也 同上 兄愛而友弟敬而順 晏

子 誰無兄弟如手如足 李華戰場文

一欣侍溫顏再喜見友于 陶 華萼相光飾瓔鳴悅同響 謝

人稀書不到兵在見何由 杜 憶弟 頌椒添諷詠禁火卜歡

風撼鶴鳴枝波寒鴻鴈影 山谷 比年病酒開涓滴弟勸兄

酬何怨嗟 杜 卿家兄弟功名震麒麟閣畫鴻鴈行 杜 君家兄弟

真連壁 坡

古今事實

謨盖不怨

父母使舜完廩捐階瞽瞍焚廩使浚井出從而揜之象曰謨盖  
都君咸我績牛羊父母倉廩父母干戈朕琴朕弑朕二嫂使治  
朕棲象往入舜宮舜在牀琴象曰鬱陶思君爾忸怩舜曰唯



事文類聚後集 卷之八  
臣庶爾其于予治

流言必誅

武王既喪管叔父其群弟乃流言于國曰公將不利于孺子周公乃告二公曰我之弗辟我無以告我先王周公居東二年則罪人斯得 善乎龐公之言比之周公管蔡若處茅屋之內宜無放殺之酷

南史劉義真傳

文身遜弟

吳泰伯弟仲雍皆周太王之子王季歷之兄也季歷賢而有聖子昌太王欲立季歷以及昌於是泰伯仲雍犇荆蠻文身斷髮示不可用以避季歷荆蠻義之

兄弟相遜

伯夷叔齊孤竹君之二子父欲立叔齊及父卒伯夷遜叔齊伯夷曰父命也遂逃去叔齊亦逃國人立其中子

有弟不恊

初鄭武公娶於申曰武姜莊公寤生驚姜氏遂惡之愛共叔段欲立之請京使居之謂之京城太叔太叔完聚繕甲兵具卒乘將襲之京叛大叔段入於鄆公伐諸鄆太叔出奔共公曰寡人有弟不能和恊而使糊其口於四方

貴介弟

伯州犁曰王子圍寡君之貴介弟也

四海兄弟

君子敬而無失與人恭而有禮四海之內皆兄弟也



以勇諾聞

漢季心以勇季布以諾聞關中

尺布之謠

漢文帝時淮南厲王長犯不軌徙於蜀不食而歿民作歌曰一尺布尚可縫一斗粟尚可舂兄弟二人不相容

田宅與弟

卜式以田商為事有少弟弟壯式脫身出獨取畜羊百餘田宅盡與弟式入山牧十餘年羊致千餘頭買田宅而弟盡破其產復與弟者數矣 王商為侯推財與弟身無所受

四人共被

後漢姜肱兄弟四人居貧作一布被而共之兄弟皆以孝行著

陳紀元方子長文郎陳群弟譔季方子孝先郎陳忠各論其父功德爭之不決諮於太丘陳是其祖也太丘曰元方難為兄季方難

為弟世說王珉小名僧彌少有才藝名出珣右時人語曰法護非不佳僧彌難為兄耳

兄不識弟

夏馥以聲名為中官所忌遂被誣陷詔下州郡捕為黨魁馥乃自剪鬚髮變形為冶家傭親突烟炭容貌毀瘁弟靜於涅陽市遇馥不能識聞其言聲乃覺而拜之

荀氏八龍

荀爽兄弟八人穎川語曰荀氏八龍慈明無雙 荀靖字叔慈少有俊才靖弟爽亦以才顯於時或問汝南許章曰爽與靖孰



賢童曰慈明外朗叔慈內潤

三虎二龍

賈彪兄弟三人號賈氏三虎晉許劭兄虔亦知名號爲二龍

馬氏白眉

馬良兄弟五人並有才名里諺曰馬氏五常白眉最良

遇賊爭死

姜肱遇盜更相爭死遂兩釋焉既至郡中終不言盜盜聞而感悔後乃就精廬求見徵君謝罪 趙孝弟禮爲賊所得將食之孝自縛詣賊曰禮瘦不如孝肥賊曉其意俱舍之

弟譽其兄

何克辟大將軍王敦掾轉主簿敦兄舍時爲廬江郡貪穢狼籍

敦嘗於座中稱曰家兄在郡定佳廬江人士咸稱之克即廬江人曰所聞異於此敦默然傍人皆爲之不安由是忤敦左遷

弟排其兄

許靖宋文休汝南人少與從弟劭俱知名而私情不協劭爲郡功曹排擯靖不得齒叙馬磨自給

雙壁

陸曄與弟恭之並有時譽洛陽令見之曰僕以年老更覩雙壁

蜂腰

周弘正幼孤及弟弘讓弘直俱爲伯父捨所養弘正醜而不陋言而能談誹諧似優剛腸似直善玄理爲當世所宗自稱有才無貌弘直方雅氣調高於次昆或問三周孰賢人曰若蜂腰矣



腰鼓

沈仲仕齊為御史中丞與兄淡弟深名譽有優劣世號為腰鼓

號龍虎狗

諸葛瑾與弟亮及從弟誕並有盛名各在一國時以為蜀得其龍吳得其虎魏得其狗

龍駒鳳雛

陸雲六歲能屬文與兄機齊名雖文章不及機而持論過之號二陸幼時吳尚書閔鴻見而奇之曰此兒若非龍駒當是鳳雛

封胡羯末

謝氏允彥秀者稱封胡羯末封謂韶胡謂朗羯謂玄末謂川皆其小字韶郎川皆早卒惟玄以功名終

為兄報仇

索靖子琳字巨秀舉秀才除郎中嘗報兄之仇手殺二十七人時人莫不壯之

伯仁火攻

周顛字伯仁友愛過人弟嵩飲醉瞑目而謂伯仁曰君才不如弟而暴得重名須臾舉蠟火擲伯仁伯仁笑曰阿奴火攻固出下策耳

因兄被誅

周凱被害王敦使人弔焉弟嵩曰亡兄天下有義人為天下無義人所殺復何所弔敦甚銜之因事誅嵩嵩事佛臨刑猶誦經

兄願代死



王徽之與獻之俱病術人曰應終有生人樂代則死者可生徽之曰吾才不如弟請代術人曰凡代死者必已年有餘今君與弟俱盡何可代獻之卒徽之奔喪不哭直上靈牀坐取獻之琴彈之久而不調曰嗚呼人琴俱亡因頓絕月餘亦卒

少者佳

王獻之字子敬嘗與兄徽之操之詣謝安二兄多言俗事獻之寒暄而已客問王氏優劣安曰少者佳客問其故安曰吉人之詞寡以其少言故知之

兄疫不去

晉咸寧中大疫庾袞二兄俱亡次兄毗復危殆瀉氣方熾父母諸弟皆出次于外袞獨留不去諸父兄強之乃曰袞性不畏病遂親自扶持晝夜不眠每撫棺哀臨極痛楚如是者十有餘旬疫氣既歇家人乃返毗病得瘥袞亦無恙

如左右手

邵續諫成都王頴討長沙王乂曰兄弟如左右手

戲知優劣

王曇首與兄弟會集子孫任其戲適僧達跳下地作彪子僧虔累十博碁既不墜落亦不重作僧綽採蠟珠為鳳凰僧達奪取打壞亦不復惜

及娶求分

繆彤兄弟四人同財及各娶兄弟求分異彤乃掩戶自搗曰學聖人法柰何不能正家諸婦聞之叩頭謝過更為敦睦之門



狀貌相似 見相貌門

紫荆枯死

京兆人田真兄弟三人共分財各居堂前有一株紫荆華甚茂  
共議破為三待明截之忽其夕樹即枯死真見之驚謂諸弟曰  
木同株當分析便憔悴况人兄弟孔懷而可離是人不如樹木  
也兄弟相感而更合 續齊諧記

諭勿爭財

蘇瓊除南清河太守有百姓乙普明兄弟爭田積年不決各相  
援據乃至百人瓊召普明兄弟諭之曰天下難得者兄弟易得  
者田地假令得田地失兄弟心如何因而下淚諸証人莫不洒  
泣普明兄弟乞外再思竟釋手而去雖分異十年乃還同住

棠棣碑

賈敦頤為洛州司馬人為刻碑市傍弟敦實又為長史人復為  
立碑其側號棠棣碑

桐木韓家

韓子華兄弟皆為宰相所居第有梧桐京師稱桐木韓家以別  
康公其家呼子華為三相公持國為五相公

兄草弟麻

錢希白惟演從兄也惟演拜相希白當制世稱弟拜相兄 草  
麻自古未有惟座主拜相門生草麻前代記之久矣 金坡遺事

弟草兄制

韓子華自鄂州再入相持國在翰苑遂當制縉紳榮之元豐官



制行曲阜之除天官南豐爲西掖行詞元豐未魯公拜相曲阜以學士草制對便殿以親嫌辭上云禁中檢見韓維故事乃批旨云兄弟迭居詞禁兄行弟辭弟草兄制是日以天寧節前二日密院罷散齋筵晉公押筵曲阜居席面會撤宣召鎖院魯公大拜榮耀又非韓公之比

事兄如父

司馬溫公光與其兄伯康年將八十奉之如嚴父休之如嬰兒每食少頃則問曰得無饑乎天少冷則拊其背曰衣得無薄乎

范太史集

同貴而壽

韓獻肅公絳兄弟天性友愛自忠憲公爲兩府大臣至公兄弟

同時爲宰相近輔皆三人又皆眉壽公將歸許而兩弟時皆七十同時請老朝廷未許其爲榮盛前古未有

行狀

卯君呼弟

蘇子由已卯生東坡嘗呼之曰卯君而不斥其名

二龍出守

以下係兄弟俱貴

梁簡文帝餞臨海太守劉孝儀蜀郡太守劉孝勝詩曰兩杜昔夾河二龍今出守

大馮小馮

馮立弟兄野王相代爲西河上郡太守民歌之曰大馮君小馮君兄與繼踵相因循聰明賢智惠吏民政如魯衛德化鈞周公康叔猶二君



並居兩省

劉禕之為左史懿之時為給事中兄弟並居兩省時論美之

同時榮達

陳堯叟堯佐俱拜平章堯咨以儒臣換節度使同時貴顯 孫何孫係孫僅皆以進士冠天下 宋庠宋郊號二宋詳見狀元門

同榜擢第

張楚金年十七與兄越石同舉進士李靖時在中書曰國家貢舉本求才行何嫌雙舉遂俱進士擢第

兩家兄弟同

溫大雅在隋與顏思魯俱在東宮弟彥博與思魯弟愨楚同直內史省弟彥將與愨楚弟遊秦同典校秘閣二家兄弟各為一

時之選論者謂少時學業顏氏為優其後職位溫氏為盛

自相交承

京闈李愬自鳳翔隴右節度代其兄愿為武寧軍節度使兄弟交換除授兩鎮

同為幕官

西川杜愷辟楊叔節度判官弟嚴觀察判官兄弟同幕時人榮之未幾同入為御史

念從弟語

以下係從兄弟

馬援南擊交趾曰吾從弟少游嘗哀吾慷慨多大志曰士生一世但取衣食裁足致求贏餘徒自苦耳當吾在浪泊西里間下潦上霧毒氣薰蒸仰視飛鳶站站墮水中卧念少游平生語可



得也

私弟以官

王衍雖居宰輔之重不以經國為念而思自全之計乃以弟澄為荊州族弟敦為青州因相謂曰荊州有江漢之固青州有負海之險卿二人在外而吾留此足以為三窟矣識者鄙之

三從同居

牛敬則與三從昆弟居四十餘年貲產無異當時以為義

三鳳

薛叔與從兄弟元欽及族兄德音齊名世稱河東三鳳

兄事子產 以下係義兄弟

孔子過鄭與子產如兄弟孔子兄事子產 史

兄事趙禹

漢張湯趙禹共定律令務在深文禹至少府湯遷廷尉彼此交懽湯嘗以兄事禹

恩若兄弟

關羽張飛為別部司馬先生與二人寢則同牀恩若兄弟稠人廣坐立侍終日

兄事同庚

孫權母謂權曰公瑾伯符同年小二月耳我視之如子汝可見事之權奉命惟謹

古今文集

雜著



送韓豐詩後序

柳宗元

春秋時晉叔向者垂聲邁烈顯白當世而其兄銅鞮伯華匿德藏光退居葆和士大夫其不與叔向游者罕知伯華矣然仲尼稱叔向曰遺直內義又稱伯華曰多聞內植進退兩尊榮於策書故羊舌氏之美至於今不廢宗元嘗與韓安平于上京追用古道交於今世以是知吾兄矣

豐之季弟泰與余善

書寄祝有道

黃魯直

柳開為叔母穆夫人墓誌其間書月旦望叔母拜堂下郎上手低面聽奉我皇考告戒之曰人家兄弟無不義者蓋因娶婦入門異姓相聚爭長競短漸漬日聞偏愛私藏以至背戾分門割戶患若賊讎皆婦人所作男子有剛腸者幾人能不為婦人言

所感吾見多矣若等寧是耶退即惴惴閉息恐然如有大誅責至死不敢道一語為不孝事開輩賴之得全其家也

朱文公作外祖遺事援此

古詩

示全真元常

韋應物

余解郡符去爾為外事牽寧知風雨夜復此對床眠始話南池飲更詠西樓篇無將一會夢歲月坐推遷

上留田

李白

行至上留田孤墳何崢嶸積此萬古恨春草不復生悲風四邊來腸斷白楊聲問是誰家地埋沒蒿里塋故老為余言言是上留田蓬科馬鬣今已平昔之弟在兄不葬他人舉銘旌一鳥死百鳥鳴一獸走百獸驚恒山之禽別離苦欲去迴翔不能征田



事文類聚後集 卷之八  
氏倉卒骨肉分青天白日摧紫荆交柯之木本同形東枝憔悴  
西枝榮無心之物尚如此參商胡乃尋天兵孤竹延陵讓國揚  
名高風細邈頹波激清尺布之謠塞耳不能聽

贈秦少儀

黃魯直

汝南許文休馬磨自衣食但聞郡功曹滿世名籍籍渠命有顯  
晦非人作通塞秦氏多英俊少游眉最白頗聞鴻鴈行筆皆萬  
人敵吾早知有覲而不知有覲少儀袖詩來剗蚌珠的皜乃能  
持一簇與我箭鋒直自吾得此詩三日卧向壁挽之不能寸推  
去輒數尺才難不其然有亦未相識

律詩

遠懷舍弟穎觀等

杜 甫

陽翟空知處荆南近得書積年仍遠別多難不安居江漢春風  
起冰霜昨夜除雲天猶錯莫花萼尚蕭疎對酒都疑夢吟詩正  
憶渠舊時元日會鄉黨羨吾廬

轍幼從子瞻兄讀書未嘗一日相舍既壯宦遊四方  
讀常蘇州詩有那知風雨夜復此對床眠惻然感之  
乃相約蚤退爲閑居之樂故子瞻始爲鳳翔幕官留  
詩與轍曰夜雨何時聽蕭瑟鄭州馬其上後子瞻通守  
餘杭復移守膠西而轍留滯於睢陽濟南不見者七  
年熙寧十年二月始復會於澶濮之間相從赴彭城  
留百餘日宿於逍遙堂追感前約作二小詩云

蘇子由



道遙堂後千尋木長送中宵風雨聲悟喜對床尋舊約不知飄泊在彭城

又

秋來東閣涼如水客去山公醉似泥困睡北窓呼不醒風吹松竹雨淒淒

子由將赴南都與余會宿於道遙堂作兩絕句讀之殆不可為懷因和其詩以自解余觀子由自少曠達天資近道又得至人養生長年之訣而余亦竊聞其一二以為今者宦遊相別之日淺而異時退休相從之日長既以自解且以慰子由  
蘇子瞻  
別期漸近不堪聞風雨蕭蕭已斷魂猶勝相逢不相識形容變

畫語音存

又

但令朱雀長金花此別還同一轉車五百年間誰復在會看錮狄兩咨嗟

寄子京

宋公序

八年三郡駕朱輪更忝鴻樞對秉鈞老去師丹多志事少之燭武不如人車中顧馬空能數海上逢鷗想見親唯有弟兄歸隱志共將耕鑿報堯仁

詩話

煮豆燃箕

魏文帝令東阿王七步中作詩不成者應大法王應聲曰煮豆



燃豆箕豆在釜中泣本是同根生相煎何太急

不肯奪嫡

曹植以盖代之才他人猶愛之况於父乎使其稍加智巧奪嫡猶反掌耳植素無此念深自歛退雖丁儀等坐誅辭不連植黃初之世數有貶削方且責躬上表求自試兄不見察而不敢廢恭順之義卒持此以自全可謂仁且智矣文中子曰至哉思王以天下讓真篤論也後村

終不怨兄

曹植贈白馬王彪云丈夫志四方萬里猶比隣恩愛苟不虧在遠分日親何必同衾憐然後展殷勤憂思成疾疾無乃兒女仁倉卒骨肉情能不懷苦辛末云離別未無會執手將何時王其

愛玉體俱享黃髮期於時諸王漂漂不自保子建此詩憂傷慷慨有不可勝言之悲詩中所謂蒼蠅間白黑諛巧令親疎蓋為灌均輩發終無怨兄之意處人倫之變者當以為法後村

夢弟得詩

謝惠連幼有奇才族兄靈運每有篇章對惠連輒出佳句靈運作春詩未就夢見惠連覺而得池塘生芳草之句自謂神助云

嫂叔

娣姒 小姑 並附

群書要語嫂尊嚴之稱儀禮 嫂叔不通問曲禮 嫂叔之無服蓋

推而遠之也 嫂不撫叔叔不撫嫂雜記 嫂溺不援是豺狼也

孟子 西方謂亡壻為丘嫂丘空也兄亡獨有嫂也或曰丘大也



長嫂稱也顏師古云史記丘字作巨皆大也

漢書注

**弟** 長婦謂稚婦為娣婦娣婦謂長婦為姒婦今或云妯娌

雅 介婦請於冢婦 內則 世皆疑娣姒之名皆以兄妻呼弟婦為

娣弟婦呼兄妻為姒公羊傳曰娣者何弟也是以其弟鮮娣自當以長鮮姒長謂身之年長非夫之年長也左傳成十一年穆姜謂申伯之母為姒昭八年叔向之嫂謂叔向之妻為姒二者皆呼夫弟之妻為姒豈計夫之長幼乎女子同出謂先生為姒後生為娣鄭云同出謂俱嫁事一夫也事一夫者以已先生為姒後生為娣則知娣姒以已之年非夫之年也 爾雅

**古今事實**

嫂不為炊

蘇秦頗賴而歸妻不下機嫂不為炊及為秦相佩六國印歸兄弟妻嫂側目不敢仰視秦笑曰何前倨而後恭也嫂謝曰見季子位高而金多也

嫂轆釜羹 轆音歷

漢高祖微時嘗與賓客過其丘嫂食嫂厭叔佯為羹盡轆釜客已去而視釜中有羹由是怨嫂及即位獨不封其子太上皇為言高祖曰非敢忘也為其母不長者封其子為羹頡侯

為嫂所嫉

陳平同兄伯居伯嘗縱平游學人或謂平何食而肥其嫂嫉平不親家產曰食糠竅耳 麥糠中不破者 有叔如此不如無伯聞之遂棄其婦故人或諶平居家時盜其嫂



不辯盜嫂

直不疑為郎朝廷毀之曰狀貌雖美善盜嫂何不疑曰我無兄終不自辯

奉嫂致恭

馬援奉嫂必致其恭不冠不入廬

小郎囑新婦

王衍妻郭性貪鄙欲令婢路上擔糞衍弟澄年十四諫郭以為不可郭大怒謂澄曰昔夫人臨終以小郎囑新婦不以新婦囑小郎因捉其衣裾將撻之澄爭得脫

為小郎解圍

謝道韞為王凝之妻凝之弟獻之嘗與賓客談議詞理將屈道

韞遣婢白獻之欲為小郎解圍乃施青綾步障以自蔽申獻之前議客不能屈列女

新婦配叅軍

王渾妻鍾氏字琰生子濟渾嘗共琰坐濟趨庭而過渾欣然曰生子如此足慰人心琰曰若新婦得配叅軍生子固不翅如此耳叅軍謂渾弟淪也

喜群從兄弟

謝道韞奕之女適王凝之甚不樂曰一門叔父則有阿大中郎群從兄弟則有封胡羯末不意天壤之間乃復有王郎

嫂撫幼叔

謝朗父據早卒朗總角時病新起體羸未堪勞于叔父安前與



沙門支遁講論遂至相苦嫂王氏再遣信令還安留之竟其論  
王因出曰新婦少遭艱難一生所奇惟在此兒為流涕携朗去

見嫂與別

阮籍嫂適還家籍見嫂因與之別或譏之籍曰禮豈為我輩

誤認伯諧 見狀貌門

叔射殺牛

隋吏部尚書牛弘弟弼好酒而酗嘗醉射殺弘駕車牛弘還宅  
其妻迎謂之曰叔射殺牛弘聞無所恠問直答曰作脯坐定其  
妻又曰叔射殺牛大是異事弘曰已知顏色自若讀書不廢

娣禮法 以下係娣姒

王渾妻鍾氏字琰弟湛妻郝氏皆有德行琰雖門高與郝相親

重郝不以賤下琰琰不以貴陵郝時人謂鍾夫人有禮郝夫人  
有法兩稱之

讓娣管鑰

李光進弟光顏先娶而母委以家事及光進娶而母已亡弟婦  
籍賢貯納管鑰於娣光進命反之曰娣逮事姑且嘗命主家事  
不可改因相持泣乃復如初

古今文集

雜著

祭嫂鄭夫人文

韓愈

愈謹於逆旅備時羞之莫再拜頓首敢昭祭於六嫂榮陽鄭氏  
夫人之靈嗚呼天禍我家降集百殃我生不辰三歲而孤蒙幼



未知鞠我者兄在死而生實維嫂恩未亂一年兄官王官提携  
負任去洛去秦念寒而衣念饑而食疾疹水火無災及身劬勞  
閔閔保此愚庸年方及紀存及凶屯兄罹謫口承命南遷窮荒  
海隅天闊百年萬里故鄉幼孤在前相顧不歸泣血號天微嫂  
之力化爲夷蠻水浮陸走丹旄翩然至誠感神及塋中原既喜  
反葬遭時艱難百口偕行避地江濱春秋霜露薦敬萍繁以享  
韓氏之祖考曰此韓氏之門視余猶子誨化諄諄爰來京師年  
在成人屢貢于王名乃有聞念茲鈍頑非訓曷因感傷懷歸殞  
涕熏心苟容躁進不顧其躬祿仕而還以爲家榮奔走乞假東  
西北南孰云此來乃覩靈車有志弗及長負殷勤嗚呼哀哉昔  
在韶州之行受命于兄兄曰爾幼養於嫂喪服必以暮今其敢

忘天實臨之嗚呼哀哉日月有時歸合塋封終天有辭絕而復  
蘇

雜著

係小姑

小姑小郎

王建新嫁娘詩云三日入厨裏洗手作羹湯未諳姑食性先遣  
小姑嘗張文潛寄衣曲云別來不見身長短試比小郎衣更長  
二詩當以建爲勝文潛詩與晉人叅軍新婦之語俱有病

請比小姑

古樂府新婦初來時小姑始扶床今日被驅遣小姑如我長迴  
頭語小姑勿嫁似兄夫

全篇見出妻門之棄婦詞

庶幾哀而不

怨矣

后村



皇文苑集

卷之八

新編古今事文類聚後集卷之八

終

十九







